


EKOMUNYAWU

 ...vammilo vaka mwaha wa soowaatta, miteko s'okokhorela muloko ni mithanu wArizona. Naahikhalana okathi wooreeraxa. Apwiya Yesu yaahinireeriha vanci-ene, voowaatta. Awo yaahiphavela ovariha muteko vakhani erattelo y'Apwiya, kinroromela wira ela, ti enamuna yooreerela ohimya, orowa ni ophiya muxerexere mwa nipuro, toko. Miyo koorowa mahiku manci-ene voohoola, naahikhalana miteko s'okokhorela muloko wala muloko ni miili ikereja sothene suulupale oPhoenix wothene, Sunnyslope ni Tempe ni Mesa ni weiwo, ni p'uhimya wene naahiphiya muxerexere mothene nuumala khweettiherya eyo mahiku mathanu a muthukumano. Nto waari muthukumano muulupalexa waarin'ahu epannte Onkela ephoyo wa wAmerika. Waari muulupale. Olya wa voosiisu wuulupalexa, ni—ni tho ni—niira ohiy'ule.

² Miyo nkaarowa owerya ohimya akavi yaakhenle Erooho Yoowaarya. Yaari—yaari etthu yoowinnuwexa akavi yaakhenle Erooho Yoowaarya, ni akavi yaavonihewe ni—ni yooponwe, yaari—yaari yoothamaleya tu. Tivo nimmuxukhuru Muluku noonaka okathi okelela ohoolo. Atthu anci-ene aalupale yaahikupali. Mmosa wa e . . .

³ Ela enoomukhaliherya vanci-ene Munna Neville. Kaahimoonu murumeyi mmosa muPrespiteriyaano, a Ekoleexiyu yuulupalexa ya aPrespiteriyaano mu . . .mulaponi mu, ainaka Muroohoni. Oh, wulu, vekeekhai yaari etthu, owo ohaakhela Erooho Yoowaarya. Vano nto owo khukiirela, owo khwira, “Kihaana emosa wa ifiita sanyu.” Khwira, “Khiyaalonke saana.” Khwira, “Yaanitupha vakhani, masi,” khwira, “miyo kaahiroiha okoleexiyu waka kirumiha.” Ni khwira . . . Kiryaaka mutthu muulupale a pisikoloxiia iwe, owo aahaamaaliha othene aya. “Ahe, awo yaahiphiyerya wiiwa Eyo emaara emosa, khula enamuna,” owo khwira. Nto owo khwira wira aahikhalana . . .

⁴ Ni khuhimya wira owo aahiphiyerya wiina Muroohoni mukereja mw'awe, nuumala waakhela Erooho Yoowaarya, nto awo khwira, “Reverendu, munrowa wiixutta liini nivalo nnya?”

⁵ Owo khwira, “Muthukumano aka waixuttaru nla.” Khoona wira yaari yootheiha vakhani, moosuwela, etthokiheryo ya oruma wa ePrespiteriyaano, ayo, khwira, “Muthukumano aka waixuttaru nla.” Tivo eyo etthu yooreera. Ntoko mwanamwane mwaamukhaani paahi, musya ni nlelo owo onkhala . . .Ahe, moosuwela etthu aarinaawe okhalaka, okhala musomiha a pisikoloxiia Mukoleexiyu yuulupalexa ya ePrespiteriyaano oBoston, ahe, ekhanle oStadu Unidu.

⁶ Kaahimoona mmosa w'alipa oowooperari murima aalupalexa a okliinika Mayo olaleya Ehapari yooreera Muroohoni ni olavula ilavulelo. Oh, wulu! Kaahimoona muratti mukina a muteko, yoowo aari a Ativentista a Seetimu tiiya, a . . . Owo aari mu—mu—muratti mmosa a muteko a murima ni mmilo nave, nto owo, mulopwana mmosa mutokweene, aahaakhela opatiiso wa Erooho Yoowaarya. Owo aahaakhela Eyo. Ohiyu umosa miyo kaamwiixathenrye matata opuwani, vano owo khwaakhela Erooho Yoowaarya. Tivo hiyo nri . . . itthu sinciene Apwiy'ahu yiiraly'aya hiyo ninxukhurelaahu, ni vanci-enexa woona okathi ula.

⁷ Vano miyo khwaahimeerya, “Munnisuwela okathi xeeni ula mwali harusi aarumpe ompaceryaawe ovekela makhura?” Waari okathi Mutheli aaruuly'awe, nto atthu, Ale yaalikanne khurowa. Oh, kinnithhapa osuwela wira hiyo ninkhala va mahiku ala ookiserya. Munnona? Kookupali wira hiyo ninkhala okathi mmosa muulupalexa olumwenku otonko aya osuwela, wookhuveelani paahi wa Orwa w'Apwiya. Eyo kahi yooreeraxa? Muupuwele, wira khula okathi vano, ntoko Soolempwa sothene siniira simaliheriwe! Nto tivo nininwehererya Yoowo okathi p'ukathi. Nto hiyo naahaana okhala vathi va iwehereryo seiyo, wira, okathi p'ukathi eyo pooti wiiraneya. Mukhale nvekelaka, oolikana!

⁸ Mwa mivaanelo kamosa-kamosa olelo, miyo, mmosa, koomusuwela misiyonaariya mmosa a oFormosa, muthiyana ookhoomala, miyaakha miloko mithanu na miili ni miraru, ni aarowa oviraka soophiyaka miloko mixexe ni mithanu. Nto owo nlelo mwa—Mwamuthiyana, ni khino siiso aakhanle mwali ooreera. Nto owo ohimnye wira oleliwe vatthokoni va oKristu vaavo “ayo” yaahimyaaya ayo, ni “nnari” yaahimya naari. Ni owo onnunwe ni elakeliwo yoolipa. Nto owo khwira, “Munna Branham, a munnuwelo ntoko, oh,” khwira, “miyaakha soophiyaka mithanu ni miraru, koonna wira kaahivahererya ekumi aka w'Apwiya Yesu.” Owo khwira, “Miyaakha soophiyaka muloko ni miili, miyo kaahootothiwa ni mulaleyi mmosa a muromolelo, wira kaahaana waakhela eparakha ya neenli,” ni khwira, “ni nkaareere wootothiwa mwa yeeyo.” Masi owo khwira, “Miyaakha soophiyaka muloko ni mithanu na miili, vekeekhai kaahaakhela Erooho Yoowaarya.” Nto owo ori va naanaano va ophavela ovenxa ikereja Patista iya kamosa-kamosa sinrupa. Owo khwira vakhala—vakhala wira yootoko okhala etthu owo oonaly'awe “yookhwa,” owo muPatista mwaneene, owo khwira, “ikereja Patista iya sookhwa nno.” Owo aaihanne “ipa s'alipa-ookhwa.”

⁹ Miyo khwira, “Ahe, kinoona wira mwakhala ohoolo w'ekhotto . . .” Kinoona wira vano owo ti . . . Muupuwele paahi, miyo, miloko mithanu ni miili, owo aari ota ntoko misiyonaariya miyo kihinatthi oyariwa. Vano nto kinoona wira kaahipacerya

wuuluvalaxa wira kikhale vapuwani. Nto kinnuupuwela, “Wulu, mukilevelele, Apwiya.”

¹⁰ Ni owo, ooloka, oohakalala saana ni ookhomaala ntoko saawery’awe okhala. Vano nto okitharihelaka misuwelelo moovirani w’ephiro, ni moota Ehapari yooreera yaaphaveliwaaya oFormosa ni—ni oXiina, ni oJapawu, ni okina. Tivo awo khimuruma ohokolowa okhuma opuwani, khwira, “Khivanweryaneya nyuwo orowa mmapuwani nvinrene miyaakha miloko mithanu ni miili, moosuwela.” Vano awo khimuruma ohokolowa. Masi owo khonrowa okhala oomaala, owo onoorowa mithukumano iya sothene Patista. Ni owo ohimnye wira, “Billy Graham,” iirale, “enamuna owo aakuxaawe mutthaka w’ePatista, yaari yoohilikana wa ekereja Patista.” Khwira, “Owo khonaakuxa mpakha awo waakhela Erooho Yoowaarya,” owo khwira. Oh, munna, mukhaleke ni yeeyo tu. Eyo ti yoolikana. Owo khwira, Axiina ale iwe, owo ohimnye wira khaahiya awo orowa paahi ni wira, “Hiyo ninnimwaamini Yesu Kristu.” Khwira, “Eyo yaari yoolikana,” masi khwira wira owo aamwaakhaliha vale mpakha etthu wiiraneya, vano nto awo yaakhala aKristu eekeekhai.

¹¹ Miyo khwira, “Ti siiso, munna. Mwaaleele paahi, mwaahiye ekhale mpakha etthu wiiraneya.”

¹² Ankhi arummwa yaahimyale wira, vano, vaviraly’aya mahiku mathanu na maxexe, “Hiyo ninnaamini wira nihaakhela Yeeyo, moone, nrowe nikupali paahi Yeeyo mwaha wo waamini ni nikeleleke ohoolo ni muteko ahu.” Moone, khiyaakhalakhala evarak’etthu. Awo yaaroolipelela iwe mpakha osuwelasa wira yaahiiraneya etthu. Nto owo t’uri mulattu ahu olelo, hiyo khininkhala okathi woophiyerya. Ahe, mwaha wa yeeyo nuumala hiyo enwery’ahu okhalana makhalelo a khula enamuna, wira etthu p’itthu, khennihaaxa, okhala wira hiyo khininkhala vale okathi munci-ene. Olelo hiyo nri muhina, meelo hiyo nri ota, ni enamuna *ela* ni enamuna *ele*. Hiyo nakhalaru okathi woophiyerya mpakha nyuwo ophiyerya okela khuwala mukhora ottuli wanyu, nyuwo munoorowa okhala vaavo nto. Munootthittiwa ekanyeryo mpakha nihiku no woopoliwa wanyu. Kinnitteeliwa murima mwaha wa yeeyo.

¹³ Ni naahikhalana okathi wooreera saana, ntoko sihimaly’aka, oPhoenix ni mukhatoni ni aKristu anci-ene iwe, anci-ene aya oowiriyana saana.

¹⁴ Miyo khuwela Omwaako w’Okuusini, amwaar’aka ottuli iwe, ni miyo. Nihiku nimosa okathi, apatthani, munn’aka, Doc, aahanle-awe n’axiruusi aili, ni—ni Munna mulopwana ni Munna muthiyana Wood yaahanle ni mmiravo, nto miyo n’amwaar’aka naarina mweeri wa oravo wa neenli. Nto awo khwira, “Bill, moosuwela, ola ti waakhalanxe mweeri w’oravo ovikana ole woopacerya.” Awo khwira, “Emaara yoopacerya naaronwe-

ahu omweerini w'oravo, etthu emosa paahi kairalyaaka waari okilaathi vapuwani ni woolipelelani nyuwo orwa okhuma wooyani," awo khuhimya.

¹⁵ Miyo p'uhimya wene kaarina erattelo yaamukhaani, moosuwela. Miyo khuupuwela, "Ahe, vano, miyo nkirina musurukhu munci-ene." Kaaroosuka mulaatthani mwa otthu wa miropo, woophiyerya orowa mukwaha wooyaya, ni nnya kaarowa othela okathi yoole wa ephovo. Vano kuupuwela, "Muhele wothene vamosa," moosuwela. Nto—nto okathi waarow'aka mukwaha wooyaya, waarowa okhala mweeri w'oravo, moosuwela, nto siiso hiyo khulupiherya. Masi okathi ula hiyo naahiliva ni veekhai naahikhuma, nto, vano, naahikhalana okathi wooreera.

¹⁶ Ni anci-ene aya anikhuma otapernakulu va. Kookupali Munna Sothmann, amusi awe ari ottuli iwe, ni Munna Tom Simpson ni akina, ni Munna Maguire, ni hiyo othene naahikhalana okathi wooreera mw'Apwiya.

¹⁷ Nto siiso hiyo naahirowa Omwaako w'Okuusini, okhanle okuusini wa oPhoenix, ni naahihuluwa eyuukhuwelo ele. Ha! Eyuukhuwelo ya epooma ya vano! Khivanxankiha wira atthu yapacerya waacerereya mulaponi, etampi, ni otuphelana sinookela. Nto miyo khuweha iwe, nto nikilanthene osulu saana wira niwerye woona ekhato ya oPhoenix, miyo khwaahimeerya amwaar'aka, "Kinniikoha imaara kavi, okhuma okathi nikilanthi-ahu va muhina mwa minuutu iya muloko ni mithanu, Nsina n'Apwiya niromoliwaaya veethiru mpooma mmwe?" Hmm?

¹⁸ Voophiyaka, ahe, mpantte muulupalexa, omukuxa Tempe ni—ni Sunnyslope, ni iwe, kinoona wira aakhala atthu emilyawu ntero mukhatoni mmwe. Miyo khwira, "Miyakha imiya tthaaru khalayi khiyaakhanle hat'etthu woohikhala ikosa ni akhwatte nno. Ni alakela, vamaithoni v'Apwiya, yaamukhala yooreera yaakhanle siiso." Ti yeeyo. Onamwi muulupale—mutteretthe muulupale awo atenke-aya iwe, ni ipa sooreera ni sikina, ti yooreera. Masi yaamukhala yooreera, yaamukhala yooreera vaakhanle wira alopwana n'athiyana yaamweetta mphironi nno ni iwe ni matat'aya osulu, envuwihaka Muluku ni omuxukhuruku Yoowo. Masi, ohiya vo, onkhala otakhaliha, wira voohiloka, owurya. Muhiye paahi osilimu okele, nto otakhala ori vaavo.

¹⁹ Miyo khwira, "Mararuwo makavi airiwe nsana ohiyu, nsana ohiyu epooma ela! Anamuhapaliwa akavi! Itthoko kavi... Akavi—itthu kavi soovutukeleleya siiriwe ewoora yookiserya, epooma ela yuulupale!"

²⁰ Nto amwaar'aka khukiirela, awo khuhimya nto etthu ntoko ela, okathi wuupuwel'aka, "Yaarowa ophwanyiha exeeni orwa nno nto? Mukhumenle-ni owaani wira murwe nno?"

21 Nto miyo khwira, “Etthu ene t’ila. Sinamwi sikhanel sothene iyo, seiyo tthiri sikhanel soowaatta, masi aakhala vakhani vathi vale. Mavekelo makavi oororomeleya awenle nsana ohiyu ohitto iwe, mwaha w’orwa okokhorela paahi?”

22 Ni Owo khaareere onireerela murima mpakha ikereja saaryaaya soosareiwa nsuwa nihinatthi otupweela, vahaaweryaneyaaya okela vapuwani nipuro nenlo. Ni mitthenkeso iye ni sikina, ni Apwiya yaahimwarexa Erooho Aya khwaareeriha. Ni nkaahiyerenrye olavula voolipa murima, kaahitthikela paahi kilavulaka voolipa-vo wa Ehapari yooreera. Nto imaara sikina, tthiri, ti yoolipa, masi t’inamuna emosa paahi ensuwel’aka. Ti yoolipa nno. Tivo enoorowa okhala yoolipaxa Opwaro Woolamuliwani weiwo onrowaahu okhala oowaakhula mwaha wa yeeyo. Tivo, mwa yothene, eyo yaari etthu yoottittimiheya. Ni nintthuna nixukhuru ekereja va mwaha wo ovekela ni okhala ni hiyo, ni—ni onikhaliha vakhiviru va mwiikimanyo.

23 Nto vano kitthikelaka owaani nto, nno, nto miyo kaamwiira kirwiye voosiis’ula khino wira kaavekelele aretta kamosa-kamosa. Kihaana mivaanelo sinci-ene sinlipelela, myiha kamosa-kamosa saya kicalenle-aka mahiku ookiserya vaphiyalyaaka nno, silipelelaka mweeri mmosa okhuma okathi keettalyaaka mukwaha. Tivo emphaveliwaaya oruuihiwa voowaakuvaxa ntoko sinweryaaya, waaruuha okhuma mapuro oohiyana-hiyana awo amphwanyaneyaaya.

24 Apwiya yatthuna, muhina mwa isumana soophiyaka piili tho, kinrowa oTucson, nlo nipuro nookhalaxa ohitto. Nto vano ni alipa a nakoso okathi ula, wira nvekelele yeela. . . Miyo khenakisiveleke wira etthu mpakha toko kikupali wira otthuna w’Apwiya. Vano, muthukumano ontharelana onrowa oModesto nto okhuma weiwo orowa oWashington, estaatu, Washington, ni orowa oZuriki, nto oPalestina, vano nto mpakha w’Afrika du Sul. Ni yothene eyo eniiraneya eriyari ya vano ni Juunyu. Ni koolattuliwa wira kilavule mmithukumanoni iya sothene. Ni pooti okivaha okathi w’okela-tho w’Afrika du Sul. Wihana waya, khula miyeeri hiyo ninnilattuliwa. Masi vakhala wira mmosa. . .

25 Wookhala okawanyeya wuulupale mukereja, ikereja Pentekosite. Nto nyuwo mwarowa-ru epantte emosa, ekina khenrowa okhalana naata ni yeeyo. Ni awo kharowa wiiwanana, tivo miyo kinikhalaaka oohuluwa vano mwa miyaakha soophiyaka mithanu ni wiihaniwa mmurimani mwaka wira kirowe. Nto vano, khino vakhala wira alipa a nakoso anookaakhela, voophiyerya paahi wira kiilpiherye, eyo ti ya mapuro oomaili, moone, nto eyo ennaakhaliha awo othene a ettukhuwelo emosa. Awo othene ahaana orwa wiiwanana mwa yeeyo okhala wira ophaveleya wa musurukhu wa sawaya—soophavela sa ikereja saya siri weiwo, tivo awo ahaana orwa wira

ekhalihe nttittimiho naya, moone. Tivo khino siiso okhanleene otthuna w'Apwiya, nnya, miyo nkisuwenle. Eyo enkhala ntoko yooreera, masi miyo nkisuwenle.

²⁶ Vano nto, mwaakha ola, Munna Borders ookinnya muttala, ahiiso, ilattulelo. Ni, voohiwoka, yaari elivuvuru wunnuwa waya vaili wa *ele* yeeyo ephin'ye okhuma Natale ookiserya, ya ilattulelo iwo. Ti yootepaxa wa muupuwelo wa mutthu ophavela olikanyiha eyo, tivo miyo nkikunxe hata emosa wa seiyo. Miyo kinrowa okuxa muthukumano mmosa paahi, ni olipelela ni woona nipuro Apwiya anikileelaaya wira kirowe okhuma weiwo, nto kinoorowa noottharelana, vano nto noottharelana, ni khula nipuro Awo anikileelaaya wira kirowe. Vano, nyuwo mukivekelele.

²⁷ Kinnuupuwela mwaisana, wu ni Munna...ahiiso Munna Cox muthiyana ohitto iwe, okathi Munna Arganbright aakilikarenle-awe wira nirowe mukwaha ola oAnchorage. Ankhi miyo kaaronwe-ru yoowo kaanyiheryaka paahi wira yaari yoolikana?

²⁸ Vano, miyo kuupuwela yeeyo, *waanyiherya*, miyo koolaleerya mwaha wa yeeyo. Miyo kaahihimya okathi oronw'aka iwe, khwaahimeerya amiravo ankaravari ifiita, "Muhikaravari ifiita. Muhirowe iwe okaravari ifiita, miyo kinrowa olaleerya myaha imosaru kilalenrye-aka nno." Kinoona wira kaahilaleya mmosa kilaleiye-aka va, sikina saya sothene saari sa naanaano. Nto Munna Maguire khukaravari, sothene saya.

²⁹ Waanyiherya. Tivo kaaronwe-ru, *kaanyiheryaka* iwe, tthiri yaamukhala yoovirikana n'ile yaaphiyenrye okhala, yoowoona khiyaarowa omaliheriwa. Masi yoowoona yaahimaliheriwa, ni nyuwo othene moosuwela eyo, moota Apwiya yaareerihaly'aya.

³⁰ Vano, yookhala etthu ekina enkhala vamurimani vaka okathi munci-ene. Ekereja, evekelele yeeyo. Nyuwo othene va munnisuwela wira okhuma kiry'ene mwammiravo miyo nkinakhaleke oohakalala murima elapo ela. Murim'aka wothene kweekwe waatthunaka Onkela nsuwa. Ni kinnuupuwela okathi waathikilaaka malaxi wa amaathi aka iwe nipuro naamukhaani naari e...naari na ekereja va, nipuro nenlo. Miyo kaari vaxikattani, vano Erooho Yoowaarya khulavula ni miyo, Eyo khwira, "Nkikhanle wooreerihani-tho mpakha nyuwo okiiwelela Miyo voomalela, ntoko Abrahamu." Munnona? Nto, Abrahamu, Muluku aahimulela wira aivalaanye ni akhale meekhaawe. Nto, vairaly'awe, owo khwaakuxa ni yoowo atithi awe, musulu awe. Nto mpakha Abrahamu omwiwelela Muluku voomalela, vano waahikhala omaliheriwa woomalela wa etthu Muluku aamulaihenryaawe. Ni nlutte, nimosa wa malutte maalupalexa naakivarelela nno, yaari ame aka. Nyuwo moosuwela eyo. Nto vano amaama aarowa okhala n'Apwiya

Yesu. Ni miyo—miyo nkinsuwela epantte xeeni y’orukunuwela, etthu yo wira, vano nyuwo mukivekelele.

³¹ Vano, Munna Neville, miyo kaakhumela vaplataforma, kuupuwela, “Ahe, miyo kinoorowa vale.” Ookhala aakirweenle khwira, “Wulu, awo aakhalana muteko w’okokhorela muulupale ohiy’ula.” Khwira, “Anrowa okhalana epantte ya olaleya, epantte ya masipo, epantte ya mavekelo, nto nuumala waakhela soovaha, vano nto khwira wira awo aakhalana o—aakhalana epantte ya orapiha inawu, ekomunyawu ni muteko wa opatiiso.”

³² Miyo kuupuwela, “Munna oohaawa! Wulu! Wulu, sothene iyo, koosuwela exeeni iyo, alakela nuumala olaleya voolipa voosiis’ula.” Vano, kuupuwela, “Kinoorowa vale, khino owo onthuna wira miyo kivahe ekomunyawu.”

³³ Nto owo khwira, “Nyuwo munoolavula wa hiyo ohiy’ula nyuwo moonaru wira muheettiheriwa?” Vano miyo koosuwela etthu enihimyaaya eyo. Vano nto miyo khurwa wiithela khukuxa Yoolempwa emosa va khukuxa soolepa kamosa-kamosa, nto khino Apwiya anookikhaliherya ovahererya Mutthaka mwaamukhaani wa iwoora soophiyaka xexe, vano nto ninookhalana yawihu—orapiha wahu inawu, nto nuumala ekomunyawu. Vano nto, nto, oh, miyo, khino kinoomaliha ohinatthi okathi uwo. Nnari, miyo kaawoopelani iperwa paahi. Minuutu soophiyaka miloko miili, miloko miraru, nto nuumala ninookhalana opatiiso, inawu-. . . Exeeni entthara ela, ekomunyawu? Ekomunyawu entthara ela, nuumala muteko w’opatiiso.

³⁴ Vano, hiyo ninnitthapa wira munrowa opatisiwa. Vano, Muluku atthuna ni eyo yamusivela Yoowo, ni yakhala saana ni pastore n’atthu, Ettiminku enrwa voosiisu kinimoorwa waavekelela aretta, ni olavula, Apwiya yatthuna vale, Ettiminku ila enrwa, okhala wira khino Ettiminku enttharelana kinimweetta-tho mukwaha nto. Nto vano kakhala weno, onikisivela orwa ni—n’ulavula va, okhala wira hiyo nri ntoko vooxirikha ntoko axinna, ni Munna Neville ni miyo va, ni hiyo—hiyo ninniphentana mmosa ni mukhw’awe, ni hiyo—hiyo—hiyo nintthuna nikhale oovaraana ni okhaliheryana mmosa ni mukhwaawe ntoko. . .

³⁵ Ela enkhala ntoko oveeha, masi kinroromela wira kheniiweya siiso wa nyuwo, Mwenye Cory aahihimya emaara emosa, owo. . . miyo mukampaanyani ya maluuxu, kaatumiha maluuxu a ekupaniya. Vano owo aahithuma eyaattelo yuulupale ya maluuxu yaarowa omukuxa miyaakha mixexe wala mithanu, voottharana miyo kimuthuma Ford awe. Owo khwira, “Billy, kookupali wira hiyo ninoosunana ottuli paahi mmosa ni mukhw’awe.” Tivo ti, ahe, ntoko enamuna y’okhaliherya okathi woophavela. Tivo ti—ti yeeyo. Hiyo noosuwela moota wo orwa

woopolana mmosa ni mukhw'awe ni okhaliheriyana mmosa ni mukhw'awe.

³⁶ Vano, nikelele epantte ya xariya ya yeeyo vano, nto kaahivonye vale, kookupali wira kinnimoona Munna Beeler epantte ya ottuli iwo, munna mukina murumeyi. Nto olelo okathi ovinryaaka ohoolo, Munna Junie Jackson eemenle va vapuwani ni Munna Creech. Awo annikhalana okokhorela va imaara kamosa-kamosa? Muteko w'opatiiso, kinnoona. Vaareera, hiyo ninoowerya ovaha maasi awo yamphwanya namwiivahererya. Hiyo—hiyo nookhalana maasi, vaareera.

³⁷ Nto vano, okhala wira ninrowa okhalana ekomunyawu, miyo kihupuwela wira yaamukhala yoorera vaakhanle wira kaamulavula mwaha wa ekomunyawu minuutu vakhani paahi.

³⁸ Vano nihinatthi waattamela Masu, nrowe nihiye itthu sothene vano, ni inamuna sahu sothene sa onamwane ni omwaana, ni—ni naattamele Ohoolo wa Muluku ni mavekelo. Nivekele. Vano ni muru ahu wowuurama, ni miyo kinroromela wira ni murima ahu nave, yaakhanle-ene yoovekela mu yaarowa...nyuwo mwaatthunaanyu osuweliha wa Muluku, ni mwaatthunaanyu wira miyo kiwuupuweleni ohoolo wa Muluku, musuwelihe eyo munvenxeryaka ntata Muluku. Muluku ovaherye yoovekela ya khula mmosa.

³⁹ Muluku Oowerya sothene, Tiithi awe Pwiy'ahu Yesu Kristu, Ole omuhimunxe Yoowo mw'alipa-ookhwa khimukhaliha moonoo woolopwana wa Omwene, onkhala voohimala-tho wira alapele attharihaka itthu hiyo sinaamini-ahu wira Owo ooniirela, ni ninihimya-ahu okhala siiso. Hiyo ninvekela Pwiya Muluku, wira ohiy'ula, wira Nyuwo mulevelele itampi sahu. Oh, ninthuna nitthikele okhala vathi v'Ephome okathi wothene, maana khaninsuwela saana etthu ekhanle okhumelelaka. Itthu sothene siri ntoko soomalihiwa, hiyo ninnoona, Pwiya, wira orwa w'Apwiya ori vakhiviru. Ni nnimwiiythokiha wira nitthare mukwaha. Ni nuupuwelaka mukwaha, hiyo pooti wuupuwelaka matthuka, ni—ni ikuwo sikina ni ixapattho sikina. Masi moota eyo evirikanne-aya ni mukwaha ola! Khuhiyo opaka matthuka; ti otaphula matthuka, ohiya epantte aya. Ntoko murumeyi Anyu muulupale, Paulo, sihimaly'awe muLiivuruni mwa aHeperi, kapiitulu 12, "Hiyo nnoohiya itthu sothene sinnittiyelela ni ohaamini onnirukurerya vookhweya-vo, wira niwerye otthimakela ni ovilela muteko yoowo oleeliwaahu."

⁴⁰ Ni hiyo khaninwerya olaleerya vano itthu sooreera olumwenku ula wa vano. Etthu emosa paahi nikhanlyaaahu olaleeryaka s'eprofeta ni Erooho ihasara, mikattyamiho, itetere sa elapo, mawimpi maalupale, nsuwa ni mweeri sihaaryaka-tho, ekereja okathi wa Lawotiseya, Kristu ota wa mukhora, amanaka nsele wira avolowe. O Muluku! Vekeekhai ntoko Mikaya a khalayi, vaaweryaneyaya sayi owo omureeriha Akhabi okathi

yoolaleeriwa y'eprofeta yaaryaaya yoompwapwela yoowo? Okathi profeta ole muulupale oowerya, Eliya, aamwaattamenleawe, ni okhala wira owo aahikumihha ekumi ya mulopwan'ole oohittheka, Napothi, vano owo khwira, "Alapwa anoolata ephome anyu." Vano moota xeeni Mikaya aakhanlyaawe olaleeryaka ithu sooreera?

⁴¹ Vanweryaneyya sayi aana oosarihiwa Erooho olelo waalaleerya s'eprofeta sooreera atthu anatampi, oohicaliwa yaakhalinhe Apwiya ota? O Muluku, hiyo ninoona paahi owaawa wa ehukumu ohoolo. Ni naakhuwelelaka ale ahikhanle saana, "Mutthyawele w'Apwiya, maana Awo ti Mwala mutthayani mowuuma! Awo ti Ntthyawelo okathi wa mwanankhaya. Ni Nsina n'Apwiya ti Namukattha a Ikuru, vano anaxariya antthyawela Vaavo n'ukhala oolipa." Ninwerya sayi wuupuwela mittetthe iye suulupale saatekiwe, sa ntthyawelo, nto okathi mulipa-ootthimakela...ottuli wa mutthu nto owo aakela mu—munamukattha, owo aakhala oolipa, khiivo yaawerya omukwannya. O Muluku, munitthuniherye nitthimake ni naakuvele w'Apwiya, maana Awo ti Ntthyawelo nahu ni Ikuru sahu, ni mukhaliheryo woolikana okathi w'oxanka. Tivo, niwehaka ni niitho na xawawe, p'uhimya wene, mukattyamiho opakeyaka, meeku evilikeyaka, etari ni okukutteya wa ehukumu sirwaaka elapo ya vathi, hiyo noosuwela wira mwanankhaya ori vakhiviru.

⁴² Ohiy'ula, Pwiya, hiyo ninaavekelela ala va avenxale matat'aya. Nkisuwenle etthu awo yaatthunaaya, Tithi, Nyuwo munnisuwela. Kinvekela wira Nyuwo nvaherye ithu sothene munepa aya wooreeraxa, yoochimya ele ottuli wa ntata nivenxiwe. Munivahe, Pwiya. Mwaavonihe aretta. Mwaakurunuxe murima oowoceya. Munvahe ohakalala ole oopuheriwa. Munvahe murettele ole oowoceya, yoolya ole oovoliwa etala, yowuurya ole ovoliwe ntthona, ohakalala ole oriipiwe murima, owerya ekereja. Pwiya, mmuruuhe Yesu eriyari ahu ohiy'ula, okathi oniilikanyihha-ahu wira naakhele ekomunyawu enthoonyerya erutthu Awe yookheriwa. Hiyo ninnivekela, Pwiya, wira Owo onithotole mwa enamuna yoowooneya.

⁴³ Mureerihe muthukumano ola mwaamukhaani, pastore aya oophenteya, Munn'ihu Neville n'amusi awe, ni matiyaakono, maatiministratore, ni khula mutthu ori va. Mwaareerihe akina, Pwiya, mulaponi mothene, anwehererya ni ohakalala orwa w'Apwiya, mithuko soolikana, ni ixamaniya sothene sooratteliwa, ni Waarya wa Ehapari yooreera waaryaka mapuro ooriipela.

⁴⁴ Vano, mukikhaliherye, Pwiya, ni Masu ala vakhani. Mureerihe Yaawo okathi onsomaahu Yaawo, ni munivahe etthu anihimya-aya, maana hiyo ninvekela mwa Nsina na Yesu. Amen.

⁴⁵ Vano nikhunle Muliivuruni, ekapiitulu 6 ya Yohani Oowaarya, ni yaamukhala yooreera khula mmosa a hiyo aasomme ekapiitulu ila yothene narowa owaani. Kaatthuna kisome, opacerya eversiikulu 47, mpakha 59, nave, ntoko enamuna paahi yo ohela elikanyihelo wa yoosoma mwaha wa: *Ekomunyawu*.

Yesu alavulaka vano, oniirani. Waari okathi muulupale, meera ala ti yaari-aya. Awo yaawurya maasi yaakhuma vamwala, wira ethoonyerye Mwala waari mothakoni. Ni awo yaanilya, emana yaamonre miyaakha imiya sinci-ene khalayi, mwa otthapela. Naari niira na paasikha paahi, ntoko sirinaahu ohiy'ula.

Vekeekhayi, vekeekhayi, kinooleelani wira, Ole onikaamini miyo ookhalana ekumi ehinimala.

Miyo ka yoolya ya ekumi.

Axitiithi anyu yaahilya emana mothakoni, nuumala khukhwaasa.

Ela ti yoolya ekhumme wirimu, wira ole onrowa olya yeela, ohikhwe.

Miyo ka yoolya ekumi yeeyo ekhumme wirimu: akhala mutthu onlya yoolya yeela, owo onookhala voohimala-tho: vano yoolya enrowaaka ovaha ti erutthu aka, yeeyo enrowaaka ovahererya ekumi ya molumwenkuni.

Vano aYuta yaanivaanyihana yiiraka, Onwerya sayi ola onivaha erutthu awe wira nikhuure?

Vano Yesu aahaaleela wira, Vekeekhayi, vekeekhayi, kinooleelani wira, Mwaahikhuureru erutthu ya Mwaana a mutthu, ni mwaahiwuryeru ephome awe, nyuwo khamunkhalana ekumi mwa nyuwo.

Ole onkhuura erutthu aka, ni onwurya ephome aka, ookhalana ekumi ehinimala; ni miyo kinoomuhihimuxa nihiku nookiserya.

Tthiri erutthu aka ti yoolya ya ekeekhayi, ni ephome aka ti yoowurya ya ekeekhayi.

Ole onkhuura erutthu aka, ni onwurya ephome aka, onnikhala mwa miyo, ni miyo mwa yoowo.

Siiiso Atiithi yaawo arina ekumi akirumme, ni miyo kinnikhala mwaha wa Atiithi: siiiso-tho ole onikhuura erutthu aka, onookhalana ekumi mwaha wa miyo.

Ela yoolya ekhumme wirimu: kahi ntoko axitiithi anyu yaalyiye emana, khukhwaasa: masi ole onlya . . . yoolya ela onookhalana ekumi mahiku othene.

Owo aahihimya itthu iya mpaani moothukumana, axuttihaka oKafarnawu.

46 Apwiya ereerihe Masu Aya. Kintthuna, minuutu vakhani paahi, kilavule mwaha wa: *Ekomunyawu*. Nuulumo *ekomunyawu* nnihimya exeeni? Okhalana *ekomunyawu* enihimya “ovaneela.” Okhalana, e...*Ekomunyawu* vekeekhai enihimya “opatthana, olavula mmosa ni mukhwaawe.” Mwaalavulaka mutelefoonini ni mutthu, okhalana nvaanelo mmo, munkhalana *ekomunyawu* mmosa ni mukhwaawe. Nto naaronwe epantte khweemela wiithela wa empa, mutthu mmosa ni pastore, wala atthu ene aili, awo ankhhalana *ekomunyawu* mmosa ni mukhwaawe.

47 Vano, khivankhalaniwa *ekomunyawu* ni raatiyu, okhala wira khivanweryaneya waakhula, wala etelevisawu. Masi okathi...Vanniweryaneya ni telefooni, okhala wira munkhalana *ekomunyawu* mmosa ni mukhwaawe, kehiyo epantte emosa paahi. Eyo ti...Miyoyo nkikhanle okhalanaka *ekomunyawu* ni nyuwo vano, okhala wira nyuwo khimunaakhula. Vano, tivo, khiwaarowa okhala orwa omwiiwa murumeyi olaleya mutthaka awe. Khiyaarowa okhala yeeyo, othukumana, wira ekhalaniwe *ekomunyawu*. *Ekomunyawu* khiyaarowa okhala yeeyo...Nyuwu mwarwaaru paahi okhalana *ekomunyawu* ni murumeyi, nyuwu mwaammwiihanela epantte emosa, wala khula mutthu, nto mukhalane *ekomunyawu* ni mulopwan'owo wala muthiyan'owo.

48 Masi munkelaahu-mo, *ekomunyawu*, eri wira khula mmosa a hiyo ntoko mutthu okhalane *ekomunyawu* ni Kristu. Iwo t'ukhanle okhalana *ekomunyawu*. Vano, okhalana *ekomunyawu* kahiyo *mmosa* paahi olavulaka, hiyo paahi nilavulaka, masi olipelela ni woona etthu Owo onnileelaawe.

49 Vano, ti vaavo, imara sinci-ene, hiyo nniir'ahu ivonyeryo sahu suulupale, okhala wira, hiyo paahi ti ninlavula nave khaninlapelela ni onvaha Owo okathi wo waakhula. Hiyo ninoorowa imaara sikina, niniira, “Pwiya, miyo kaatthuna wira Nyuwu mwiire *elexe ni elexe ni elexe ni lexe*, amen,” ni ovenya ni orowa. Vano, iwo vekeekhayi khuhiyo okhalana *ekomunyawu*. Iwo orowa ni ovekelo ocaleliwa. Masi nyuwu mwaakhalaka okathi woophiyerya mpakha Owo waakhula, ti vaavo vanweryaanyu okhalana *ekomunyawu*, okhalana *ekomunyawu* n'Apwiya. Vano, ni enamuna emosa yooreera okhalana *ekomunyawu*, onkhala wiiwanana, ohaana wiiwananiwa mwaha wa itthu kamosa-kamosa. Vano, nto ti yootikiniha wira imaara sikina naakuxaka itthu iyo... .

50 Olya ontakanxana ni yeeyo. Vano, nyuwu mwaakuxe alipa a nakoso, awo yaatthunaka omwiira nakoso, awo anoomulattula mutthu wira yalye ohiyu. Vano nuumala okilaathi khulya, vano nto anoolavula mmosa ni mukhwaawe. Mulipa-ootumiha oosuwela, voolimaleleya owo khokhanle olavulaka ni mutthu ni nipwiipwi moohikhal'etthu. Ti yooreera olipelela mpakha owo oone oreera, nto nuumala olya voosiisu. Muhirowe iwe

omukumiha voolilini munamuleela mwaha w'etthu murin'anyu wira mmutumiherye, masi mulipelele mpakha owo olye voosiisu nto—nto omphwanyaneyya oratteene mwa mukhalelo.

⁵¹ Nihiku nlo, kilalैया mwaha wa muthiyana aarapinhe inawu sa Yesu, oCanada wu miyo kaalavula yeela, kihimiyaka wira okathi mulipa-oolattuliwa aarowaawe omuxekurya mutthu mukina, mutthu ola aahikhalana iyiirelo aarinaawe oviramo ohinatthi vekeekhayi woona okhala oolikana wira orowe oxekurya, wala, okhalana ekomunyawu. Oxekurya ti okhalana ekomunyawu. Vano, aarwa wa...Oolattuliwa, yoopacerya mwaahaana olattuliwa. Vano mwaamphiya vamukhora nto karumeya aarapiha inawu sanyu, mwaha wa mukwaha, nyuwo mwaakhalana wunkha wa i—wa inama ni sikina nviraka mphironi. Awo othene...atthu yeetta mukwaha ephiro emosaru ni axinama, nto—nto vo waakhala wunkha ni ntthupi, ni yoowara ya oPalestina yaanikuxa eyo ni ovara oviheriwa wa mmwettoni, ni wiitho waakhala woohikhuneeliwa, ni—ni mmatatani. Nto—nto mutthu aakumananiwa vamukhora, karumeya t'aira, ni aanirapiha inawu saya. Nto nuumala mulopwana mukina aakhala vale ni etuwaya ni ma—makhura oowunkhela, ni yaanitatheliwa makhura yaala oowunkhela mmatatani, ni ottikittheliwa sa, ni—ni ottikittheliwa wiitho waya, vano okuxa etuwaya ni wiisuukuttha. Eyo yaanikumiha etthaya yothene ni wunkha. Ni yaahikhalana etthu yooniha eriiryelo, ntoko mentooli, ni yaaniwooniha saana.

⁵² Vano okathi waavolowaaya, kahi ni ixapattho sanyu sooriipa, itapeti iye sooreera, awo yaanikhalana ekhaani, ntoko campali mwaamukhaani, nto yaanivolowa. Vano nto na—namulattuliwa aanivolowa vano—vano nto namalattula aana—anaapehari ntoko orwa saana. Ni, moone, nyuwo khimwaarowa otthuna wira mulipa-oolattunleni oopecarini nyuwo munkhaka. Khimwaarowa otthuna wetta mutapetini muryeene oottakatta. Vano nto ole olattunle aamoopcarini ntoko orwa saana, vano nto nyuwo mwaari mmosa a vatthokoni.

⁵³ Nto, vano, Muluku ookhalana itthu iyo. Nihinatthi wiilikanyiha wira nikhalane ekomunyawu ni Muluku, nihaana toko orapihiwa ni maasi a Masu. Ovalaaniha, maasi oovalaaniha annivalaaniha hiyo ni itampi sahu. Vano, yoopacerya, nyuwo khimukhanle olavulaka ni Muluku ni khimukhanle okhalanaka ekomunyawu ni Muluku, ni yookhala...Yoopacerya, muhaana orukunxa murima mwaha w'etthu mwiirale-anyu, okhala wira nyuwo khamunwerya waamini mpakha murukunuxe murima, “Apwiya, mukilevelele ohaamini waka.” Munnona? “Mukilevelele ohaamini waka.” Nyuwo muhaana orukunuxa murima, toko. Nto, mwarukunxa murima, nto nyuwo mwa...itampi sanyu sivinre sooleveleliwa, nto nyuwo mwa namwiivahererya vano a opatiiso. Vano, ni Owo oolaiherya Erooho Yoowaarya, nuumala opatiiso.

54 Vano, etthu ene t'ila, wira, mwa ekomunyawu yeela, ninnoona wira waahikhala o—orapiha inawu ni itthu sootakanxana ni yeeyo, nave-tho, orapiha inawu sahu, ntoko nthoonyeryo na okukuttha wa Erooho Yoowaarya.

55 Vano, nto, ohaana okhala moonelo wa ipantte soopiili. Nyuwo mwakhala oonviruwela mu—mulipa-oolattunleni, weeso nyuwo—nyuwo khamunwerya okhalana ekomunyawu. Nnari, nyuwo—nyuwo khamunwerya wira, okhala wira khamuniwanana ni owo. Masi mwakhalaru oowiiwanana, vano munoowerya okhalana ekomunyawu. Tivo ti siiso enkhalaaaya naarwaaka vameesa v'Apwiya, nihaana okhala oowiiwanana ni Masu Aya. Munnona? Nihaana oyariwa vasya, Erooho ya Muluku mwa hiyo yiiraka “amen” wa khula Masu Owo olempeawe, vano ninoowerya okhalana ekomunyawu ni Yoowo.

56 Ela hiyo nookhalana ya Muluku, murima ahu waahinilamuleke, nto hiyo nookhalana ocaliwa ni Muluku. Noosuwela wira nnimwaakhela soovekela sahu ni exonttelo ahu, okhala wira murima ahu khonnilamula. Vano, vakhala wira Muluku onnihimeerya wira nihaana oyariwa vasya, ni nlelo khinnatthi waakhela oyariwa vasya, vano ninnoona etthu yootikiniha vakhani wa orowa, onvekela Owo etthu p'itthu, moone, okhala wira ninnisuwela wira khanitharinhe soophavela Sawe. Etthu emosa paahi nto mavekelo a natampi. Masi hiyo ninlavula ni Yoowo okathi ompatthanaahu ni Yoowo, eyo enniruuha ekomunyawu.

57 Vano, enamuna ela ya ekomunyawu, kaatthuna kileeliherye vakhani. Vano, hiyo ninkuxa, ele eniihan'ahu *ekomunyawu*, ti mukatthe ni eviinyu. Vano, eyo ennikhala yootepanyiwa mpakha hata ehinkhalaaya yooreera olavula yeeyo. Oh, moota eyo enkhalaaaya yootepanyiwa moovirani mwa miyaakha! Eyo vekeekhai khehiyo ekomunyawu, iwo osuka yooruma paahi. Munnona? Vano, etthu hiyo eniihanelaahu ekomunyawu, okhala wira enikhuma wa oxirikha w'eKatolika wo okhala “Okaristiya Woowaarya, yoowo okhanle voohivonyeya erutthu ya Pwiya Yesu.” Masi kehiyo erutthu ya Pwiya Yesu! Eyo eyuupuwelelo paahi ya erutthu Awe.

58 Miyo nkincala anamukuttho akavi wala alaleyi, wala onakhaleru pani onreeraha eyo, owo nlelo mukatthe ni eviinyu. Khaavo namukuttho ntoko hiyo...awo annileelaaya, wira, “Muluku ohaana omwiiwa namukuttho okathi onrukunxaawe ekomunyawu,” ele awo aniihan'aya ekomunyawu, “Okaristiya, okhala erutthu y'ekeekhai ya Pwiya Yesu. Vano mulipa-oowaamini onimwaakhela eyo, vano eyo ti ekomunyawu.” Ti yoovonyeya!

59 *Okhalana ekomunyawu* ti “olavula ni, okhalana ekomunyawu ni, etthu munweryaanyu olavula-no ni eyo olavula ni nyuwo.” Eyo ti okhalana ekomunyawu. Oxitiya

khonwerya olavula. Vano, tthiri, ekomunyawu y'ekeekhai ti Erooho Yoowaarya elavulaka. Nyuwo mwaakohaka Eyo, vano Eyo ennilavula, eyo t'ekhanle ekomunyawu yoolikana. *Ela* eyuupuxeryo, okuxa e...okhomeliwa Wawe ni ohihimuwa Wawe, nto kahi ekomunyawu. Hiyo ninihaana eyo yeeyo, masi kehiyo. Eyo ekhumme okereja Katolika, omulya oxitiya ola ntoko soonalyaahu nihiku nikina mwa yooruma, nto naalavula mwaha wa yeeyo mwa *Opakawu Ovirikanyana ni oKristu*.

⁶⁰ “Moota oxitiya ola mukhaani oovilikeya okhanle-awe erutthu y'ekeekhai ya Kristu.” Vano, ekereja Katolika ennaamini iyo. Mootoko oweha wira, yaaviraka mukereja, awo ampaka nlepa na mwiikimanyo, ohetemaniha exapheyo aya, ni siiso? Kehiyo ekereja, to oxitiya ole mpaani mme, “erutthu ile paathiri otatunxe-awe okhuma oxitiya khukhala erutthu y'ekeekhai ya Kristu,” vaavo anawili ni makhule yaakhanle-aya okuxaka. Vano, nyuwo khamu, khivanuupuweliwa ntoko mutthu oosilimu ni wuupuwela wira nipattuuxa na mukatthe naamukhala erutthu ya Pwiya Yesu! Khivanweryaneya okhala.

⁶¹ *Ekomunyawu* “ovaanela, ni eyo envaanela ni hiyo, etthu envaanelanaanyu.” Nuulumo nene okhalana *ekomunyawu* nnihimya “ovaanela ni,” wala, “ophitaana ni etthu envaanela ni nyuwo.” Ni Muluku onvaanela ni nyuwo, ekomunyawu. Ni nlelo mukatthe ni eviinyu, hiyo eniihanaahu *ekomunyawu*.

⁶² Vano, Yesu oohimya va, ntoko sisomaly'aka, “Erutthu aka ti yoolya ni yoowurya, Ephome Aka, erutthu ni Ephome ti yoolya ni yoowurya.”

⁶³ Vano, hiyo nintthuna nimuupuwele Yesu ni ophitaana ni Yoowo, ele Owo aary'awe. Erutthu Awe exeeni? Exeeni ekhanle erutthu ya Kristu? Eyo erutthu y'alipa-oowaamini akhanle oophitaana vamosa ni Yoowo mwa Erooho Yoowaarya. Kahi muluku eethiru, kahi nipattuuxa na mukatthe, masi Erooho eri mmurimani mwa mulipa-oowaamini, ni awo ari oophitaana vamosa, wira okathi mutthu ni Muluku anweryaaya olavula mmosa ni mukhwaawe, aana alopwana n'athiyana a Muluku. Mutthu onookhwa, mwaha wo omwaraxiwa wa Ephome othumme oleveleliwa wa etampi, nto mulopwan'ola ni muthiyan'ola, mmiravo wala mwaaruusi, orina opatthana ni Kristu, onkhalana ekomunyawu ni Yoowo, erutthu.

⁶⁴ Ntoko iya ni amwaar'awe aarowaawe okilaathi wira elavulase mwaha wa etthu, wala mmiravo ni mposi awe, Kristu ni Ekereja Awe enkhalana ekomunyawu. Mwaha wa yeeyo enwery'ahu waakhela mutthaka wa Yoowo, ni woona ohoolo ehinatthi ophiya va, ni ninniweya ohimya ohoolo wira ti wooreera voomalela, okhala wira hiyo ninkhalana ekomunyawu ni Muluku Yoowo orina Ehimalelo mmatatani mw'Awe. Nikhalanaka ekomunyawu mmosa ni mukhw'awe, Erutthu ya Kristu, Erutthu ya erooho ya siiri ya Kristu.

Oohiphitaana ni hata enamuna emosa ya muluku a ethiru, wala mukatthe wala e—eviinyu, masi mwa e—enamuna ya erooho.

⁶⁵ Vano, Yesu oohimya etthu emosaru. Nyuwo mmukuxe Yohani Oowaarya, kapiitulu 4, alavulaka ni muthiyana veehimeni, owo aalavula etthu ntoko, “Axitiith’ihu yaawurya v’ephattuweloni vaava, ni aathipa ehimye ela, Yakope, ni—ni ohaavaha an’awe ni inama sawe maasi ala, nto Nyuwo muniira, ‘Okokhorela muttetthe *mmosa*,’ ni akina aniira, ‘Vamwaako va.’”

⁶⁶ Yesu hata—hata iirale “Minuutu mmosa paahi! Hiyo n’aYuta, ni ninnisuwela ele ekhanle, etthu enihimya okokhorela. Masi nwiriyaane ela, muthiyana. Onimoorwa okathi, nto ti yoola, anamakokhorela eekeekhai arrowaaya omukokhorela Muluku mwa Erooho ni mw’Ekeekhai. ‘Masu Anyu ti Ekeekhai.’ Nto Atithi anaaphavela yaawo anaakokhorela Awo mwa Erooho ni mwa Masu, Ekeekhai. ‘Masu Anyu Ekeekhai.’” Vano, Owo aahimuleela yeeyo muthiyana.

⁶⁷ Moone, Kristu. . . Muluku Eroohoo. *Kristu* enihimya “ole ootikittheliwa, mutthu ootikittheliwa ni Muluku,” emukhalinhe Kristu. Vano, Kristu ohimye wira, “Miyo ka Yoolya ni Yoowurya.” Kahi oxitiya, kahi oxitiya onimwaakhelaahu va. Owo kahi Kristu. Eviinyu enwuryaahu waltaari, kahi Kristu. Eyo emmuthoonyerya Yoowo, mwa enamuna ya nlikanyiho. Masi Kristu ti Erooho Yoowaarya, mureeriho ori vasulu va Ekereja, eyo ti Yoolya ni Yoowurya.

⁶⁸ Eyinlelo yuulupale ekhanle mulaponi mothene, kinroromela wira khaavo a nyuwo otonko wiiwa, masi, mwaatonko ene wiiwa, khuuvo wunla ntoko wunla wa etala. Mwaamoonaka mai ni mwan’awe, ni ohinwerya weetta mwaha wootteethayaxa, ni mwaana mwaamukhaani oluwelaka, ni erukulu awe yiipale-ene mwaha wa etala, oiweyaka naatekhume ole a murima wa mai, omoona mwaan’owo ni malaku awe ookela muhina mpakha okhala ethayi ni makhuva, ni ohiniini awe mwaamukhaani waaryaka, ni ohiweryaka hata, onyakula, maitho awe makhaani etumphe. Khuuvo wunla ntoko etala ni ntthona.

⁶⁹ Mothakoni, atthu akavi yaapweteiye ekumi mwaha wo ntthona! Ihantisi sinci-ene, kaakhanle-aka woovarelelani ohiyu wothene, sa ihantisi s’eekeekhai sa mothakoni. Moota nyuwo mwakhala. . .mwavoliwa ntthona, moota xetwani onoovahaaweni e—ekerikeri. Nyuwo muhoona eyo weno, khivanthuneya orowa Onikela nsuwa wira moone. Mukhuruwele mphironi, nto enkhala ntoko aakhala maasi mphironi. Khula mmosa a nyuwo ohoona eyo, oneettiha ekaaro ni omutthanre rampha muulupale. Eyo ekerikeri yoowooothererya. Nno okathi vakhani ovinre, miyaakha soophiyaka miraru wala mixexe sivinre, kaahisoma nipuro marattha kamosa-kamosa, evavelaka epantte ekina ya elapo, yoonalyaaya ekerikeri khumorela muramphani, yuupuwelaka

wira yaakhuruwela mmaasini. Vano awo khunyaanyeyasa, yaamananse voolipa muramphani, yuupuwelaka wira yaakhuruwelasa mmaasini, ekerikeri.

⁷⁰ Imaara kavi xetwani owiirinhe-awe etthu emosaru yeeyo atthu, waavaha ekerikeri yoowooothererya, vaavo, vahikhanle etthu vale, masi waamini-wowiipaka paahi. Atthu anci-ene olelo ankupali etiini yo wiipaka, yeereryaka opaka etthu wala wooothererya wira yookhala etthu ehikhanle siiso! Ntoko mwamuthiyana misiyonaariya ohimnye wira aahilipelela mpakha okupali. Vanreerela niireke yeeyo. Khamukhanle orwaaka wehererya-tho. Murina okathi mmosa, ni mookhalana Ettharihelo, tivo vanreerela nirowe nilukame ekanyeryo ene.

⁷¹ Wunla wa etala, mwiiwe, wunla wuulupale okhala wira wunla wooriipiha murima. Mutthu onookhwa. Nto, oh, vaakhanle wira naamuwerya ophierya nipuro nenlo, vaakhanle wira elapo ela yaanwerya ophierya nipuro siiso noovoliwa etala mwaha wa Muluku! Eyo eri mutalani yootepa ovikana ilapo ntoko Hintiya envoliwa etala ya erutthu, elapo ela envoliwa etala ya muroohoni. Masi nyuwo vanvoliwaanyu etala okathi munci-ene, eyo ennipherya nipuro nyuwo muhinsuwelaanyu wira moovoliwa etala.

⁷² Siiso ntoko oriiriwa. Nuumala ophierya nipuro nlo, muriiriwaka, munooriiriwa vanci-ene, nto nuuvira okathi vakhani munkhala ooviha. Nto moonaka oviha, munookhwa! Nto owo t'uri mulattu ohiy'ula. Ikereja sirookhala sooriyaxa mpakha sinkhwaaya mwaha wo oriirya, ni sinoona wira ti soovihiwa, mwaha wa mamempuru, nto sinimookhwa muroohoni. Okhwa! Khasinsuwela. Vookiserya, mutthu onimummaathi khurupa, nto emmalela vaavo. Khonkhalakhala-tho ovenyaka, okhala wira ephome awe yooriirya khuuma mmitikani.

⁷³ Vano, ovoliwa ntthona. Yesu ohimnye wira, "Ephome Aka ti yoowuurya ya ekeekhayi." Mwaavoliwaka etala mwaha wa ekumi, ovoliwa etala mwaha wa ekumi, Yesu paahi t'orina maasi mamosa anwerya ovoniha ntthona nlo. "Murwe wa Miyo, nyuwo othene mulemeliwe ni muhaaxiwe." Mwa Wiisuupulula, ehimnye wira, "Ole ovoliwe ntthona orweeke veephattuweloni va maasi a Ekumi owuryeke mahala." Nyuwo mwavoliwa ntthona na Ekumi!

⁷⁴ Hiyo ninnoona wira alipa oosoma ittheneeri annilopola, woovirani wa epantt'ila yoopacerya wala epante yoopacerya ya mweri, opacerya nihiku na neenli wala na neethanu, wala woovirani wa mweeri ula, alipa-oosoma ittheneeri aHinti annilopola wira olumwenku onoophuleya. Ni ipaphelo sa ihapari sa wAmerika sinoonyemula eyo. Miyo nkinaamini wira olumwenku onoorowa ophuleya, masi kinihimya wira ti yoovonyeya onyemula. Okhala wira, yookhala etthu ehanle

okhumelela nihiku nlo, etthu emosa yoolattana ni yeeyo, okathi iplaneeta thanu, Marte, Yupiteri ni Venusi, ni—ni sikina, sinkelaaya mwa sawaya—sawaya. . . Iyo khasinaireke eyo. Oh, enihimmwa wira khino miyaakha ikonto miloko miili ni mithanu sivinre, masi t’ani aari ottuli wu wira osuwele?

⁷⁵ Miyo kinnilopola wira ela yookhalana elikanyihelo ya muroohoni. Kookupali wira orwa wa mwaha wa Muluku, wira miyuupululo suulupale sa Masu sinootaphuliwa okathi yoola. Muupuwele, enihimmwa wira saari ittheneeri tthaaru saakenle moovilikeyani mwaya okathi Yesu oyariw’awe. Nto ela ti thanu, ni thanu ti mahala, nummaru na mahala. Tthaaru ti nummeru na oloka voomalela. Thanu ti nummeru na mahala, Y-e-s-u, m-a-h-a-l-a, w-a-a-m-i-n-i [Jesus, grace ni faith, nttaava n’Enkelesi—Mot.], siiso. Nummeru na mahala! Muluku aveleeliharu owerya Wawe mukereja, anrowa okhala mahala Awe, khonrowa okhala wiiwelela w’atthu. Ni Yesaya oohimya, kapiitulu 40, moota wo “omukhuwelela Yerusalemu, wira ekhotto awe yaahimala,” onaamwi owo aari oottheka mwaha wo waakokhorela a muluku a ethiru, masi yaari mahala a Muluku yaaveleelinhe eyo. Muluku aniveleeliheryaru etthu hiyo, anrowa okhala mahala Awe nave kuhiyo ophwanela wahu. Tivo, siiso eyo ehimya etthu. Kinoohimya wira enookhala erukunuwelo. Nkisuwenle ele enrowa okhala, masi kinnaamini wira ehanle wiiraneya. Hiyo nri va . . . vakhiviru saana va yeeyo vano.

⁷⁶ Nto akhala mutthu ovoliwe etala, orwe wa Kristu. Akhala mutthu ovoliwe ntthona, orwe wa Kristu. Owo onnivoniha ntthona. Owo ti Nammaliha a ntthona nahu nothene ni etala.

⁷⁷ Kaahikhalana ehantisi emosa kaaleeliwaaka woovira okathi. Siiso kitonko ene ohimya yeela mukereja mu. Kaahimye-ene, kileveleliwe mwaha wo othkikela wira kimalelihe mwaha paahi. Aahikhala muhooli mmosa muHinti, ahiiso, enamuna emosa ya mulipa-oowehexaxa a atthu othene a aHinti. Owo eetta mukwaha elapo ya aNavajo, ni aari, khurimeela. Nsina nawe aari Coy. Ni owo aathara mphito mmosa, mphito wa axinama ooxaiwa, nto owo khuupuwela, “Vano, miyo katthara-ru mphito ola, tthiri kinoophwanya maasi.” Nto ekhavallo awe khiyaareere ovoliwa ntthona mpakha nlu mi naya naakhumenlyaaya ota, noowuuma, iphula saahixeerya ni mithaaka. Owo aavarenle nleeso nawe wiitho wawe mutthekuni sa ithaaka mpakha osareya mithaaka, ni aampweteya, otthunaka maasi. Ni owo aari ohoolo ahoolelaka ekhavallo awe okathi waaphwannye-awe mphito. Nto owo khwira wira, okathi owenlyaawe vakhavaloni owo aahoona mphito ola, khwira, “Vekeekhai onookiroiha vari maasi.” Vano owo khuwela ekhavallo awe khupacerya otthara mphito.

⁷⁸ Nto ekhavallo yaahisuwela nave wira yaari mumphitoni waaroiha vaari maasi. Moota Muluku onvahaawe esimu inama sihinuupuwela! Nto yaahitthara mphito. Mpakha, vakhani

saarukunuwela epantte emosa, vakhaanixa saanikhuma ephiro yooviriwaxa. Ekhavalo yaatthuna orukunuwela epantte yeele, masi Coy uupuwela voovirikana. Owo aahiphavela okhaliha mphito muulupale waathaliwe, nto khupacerya orowa ni ekhavalo khiyaatthuna orowa. Owo khutannya, nto eyo khunyoonyiwa khupacerya orowa ephiro ekina. Ni khupacerya wiiseemexa. Yaahooceya saana wira emusukhume vakhukuluni.

⁷⁹ Vano owo khupacerya oviruwela-tho, mpakha ohoma ekhavalo, mwaha wo wuukhuwa wira ophwanye maasi, ekumi awe yaamwiinaneliwa, mpakha ekhavalo okhala vale, ethukumeleka, evuuvaka ephome. Vano owo khuweha vathi, khuweha vathi vale, nto eyo yaamuthukumela siiso ni ehalelaka omorela vathi vawe. Owo khuweha eyo, khoona ephome mpararini mwaya. Owo aari muKristu. Nto owo khwiirela ekhavalo awe, owo khwira, “Miyo imaara sinci-ene kihiiwa wira sa mutakhwani. . . ahiiso, inama sookhalana esimu. Khenkhala ntoko wira miphito iya sikhaani sinrowa epantti ile saarowa mpakha ori maasi. Enkhala wira ephiro ela yuulupale nno yaaroiha nipuro kweekwe sinrowaaya owurya maasi, masi,” khwira, “nyuwo vakhala wira mookitthepa voororomeleya mpakha va, miyo kinootthara esimu anyu.”

⁸⁰ Oh, moota onuupuwel’aka yeeyo mwaha wa Kristu! Ephiro enroiha woopwetexani ti yookwerethiwa ni yoowiiisooniha mpakha wookiseryani, masi yookhala ephiro yoorika enroiha mw’Ekumini. Ale amphwanya Eyo ari vakhani. Paahi, kahi esimu, masi Erooho Yoowaarya t’enrowa woorukunxelani epantte ele ya maasi a Ekumi. Miyo kinoona wira, Eyo yookiruha oolipa mpakha va, kinookuxa Eyo ephiro yothene enihala.

⁸¹ Wira kimalihe ehantisi, owo—owo khaaronwe emiilya nuusu, mpakha, naanaanoru, ekhavalo yoororomeleya okela etthyawaka munlittini nuulupale na maasi. Ekhavalo yaanisuwela etthu yaalavulaaya, etthu yaahimyaaya mwa enamuna aya yo olavula ni na—nakhavalo. Owo khukela mwemmo. Owo ohimnye wira aahitathela maasi mphulani mwa ekhavalo. Owo aahiirapiha, aahinyakula ni okhuwela, ni aakhuwela aituperyaka, ni amwaraxelaka maasi vammilo vawe, ni akhuwelaka, “Hiyo nihoopowa! Hiyo nihoopowa! Hiyo nihoopowa!” Ni ekhavalo, ewuryaka, ni ethukumelaka. Nto owo aahiweha epantte aya yaavuuva ephome, vano yothene yoovulala ni malepa a oviruwela.

⁸² Nto khwira okathi ene yoole, owo khwira. . . aahimwiiwa mutthu wira, “Mukhume mmaasini.” Nto owo khuweha, nto aahikhala namompe mmosa a mukhalelo woovirikana eemenle vale. Vano owo khukhuma mmaasini. Owo khwira wira aahoona wunkha mooro, nto khuweha vale, nto naahikhala nikhuru n’axilopwana naataphunle iheema vaavale. Awo yaarookhalasa mmukotini. Awo yaahiphwanya eweero, nto ehokolowaka

yaarinasa ikhavallo saya ni ikhavallo sa miritti, khuphiya valittini va na maasi vano yaammumulasa, vano othene khuhapalasiwa.

⁸³ Ni khwira wira yaapeyasa enama ya etthove, ni owo aahilya ni yaawo. Ni khwira, mmosa aya iirale, “Nkawuryani.” Owo khwaahimeerya ole owo aaryawe, owo aari Jack Coy, mu—muhooli muHinti. Vano owo khwira, “Ahe, vano, nkawuryani.”

Owo khwira, “Nnari,” owo khwira, “Miyo nkinwurya.”

⁸⁴ Vano eyo eri ntoko nruwano w’atthu ale. Vano owo khwira, “Nyuwo munoowurya ele ekhanle yawihu!”

Owo khwira, “Nnari, nkinwurya.”

⁸⁵ Vano owo khuyenxa murinki, khwira, “Nkawuryani!” Oohapaliwa, othene aya, moosuwela, oophiyaka etuusiya ntero.

Nto siiso owo khwira, “Kooxukhuru, amiravo.”

⁸⁶ Khwira, “Vakhala wira enama ahu ti yoosiva okhuura, wiskhi ahu t’osiva onwurya.”

⁸⁷ Ni nyuwo moosuwela moota ankhalaaaya, anamuhapaliwa. Nto owo khwira, “Nnari,” owo khwira.

⁸⁸ Vano awo khuhela epholovolo mukapwitthini khwira, “Vano nyuwo munoowurya ahiiso munimoona!”

⁸⁹ Owo khwira, “Nnari. Nnari, nkinrowa owurya.” Vano owo khupacerya omuthoonerya kapwitthi. Khwira, “Okathi vakhaani paahi.” Khwira, “Miyo nkinoova okhwa.” Owo khwira, “Miyo—miyo nkinoova okhwa.” Owo khwira, “Masi miyo—miyo kintthuna kooleleni wahala aka kihinatthi wira eyo, etthu ehinwuryelaaka.” Khwira, “Miyo ka muKentucky.” Owo khwira, “Nto mmuxaaxani wa khalayi wa nttoro voosiis’ule, vaavo amaama yaaryaaya ekhwaaka, awo yaahikiihana epante ya olili, nto khwira, ‘Jack, atith’inyu akhwiye ni iturufu mmatatani mwaya, yaataleleiyee vameesa, oohapaliwa.’ Ni khwira, ‘Muhikhalakhale nwuryaka, Jack, etthu p’itthu eniir’anyu.” Ni khwira, “Munikwikwini w’amey’aka kaahihela matata aka. Ni kaahimanela natiri Muluku, ntoko mmiravo a miyaakha muloko, nkaarowa okhalakhala kikhalanaka owurya waka woopacerya.” Owo khwira, “Nkinatoko owurya.” Ni khwira, “Vano mwaatthunaka omoopa, mmoope paahi.”

⁹⁰ Nto namuhapaliwa onvenxaka kapwitthi khuyenxa-tho murinki, khwira, “Munoowurya ahiiso kinoomoopa!” Nto okathi ene yoowo kapwitthi khoopeya khuphweeya murinki.

⁹¹ Aahikhala namasukiha inyompe mwaamukhaani eemenle epante ya ekhato, a mukhalelo wootikiniha, maithori emoraka wiitho. Owo khwira, “Jack, ni miyo kikhumme oKentucky. Miyo kaahaamanela natiri amaama nihiku nimosa, masi koomuhonona natiri aka.” Owo khwira, “Miyo kaawehererya aximiravo ala mpakha okhala oohapalasiwa, nto kaarowa wiiva nikhuru nothene na yaawo, khula enamuna, kikhuxee eweero

yothene awo yaarin'aya." Owo khwira, "Masi ka namuhapaliwa ni koovonya. Masi," khwira, "Kookupali wira okathi kapwitthi aka orumalyaawe mukhatoni wa Wirimu, amaama yaahikiwa omulipiha natiri wira nkikhalakhala kiiraka-tho." Nto vo, ni mahala a Muluku, owo aahiweettiherya atthu ale othene wa Kristu, othene ale vale.

⁹² Moone, yookhala etthu mwaha wa maasi, etthu mwaha wo oriiraha. Entthunaaka ohimya ti, ophiya vari maasi mwavoliwa ntthona. Eyo enniwiirihani etthu, ophiya vari maasi mwavoliwa ntthona.

⁹³ Vano, Owo ohimye wira, "Kinoohiyeryani murettele Aka. Kinoovahani murettela Aka." Kahi ntoko olumwenku onoovahaayani murettele, masi enamuna Owo onoovahaaweni murettele. Murettele Awe onnivoniha ntthona nahu. Vakhala wira ninniphavela murettele, vano nrowe niiriirihemuretteleni Mwawe, wira nisuwele wira nookhalana murettele ni Muluku mwa Pwiy'ahu Yesu Kristu. Owo ti Nanvaha ahu a murettele onvoniha ntthona nahu.

⁹⁴ Eversiiikulu enihimya wira, "Owo ti Yoolya ya ekeekhayi ni Yoowurya ya ekeekhayi." Kookhalana nthoonyeryo naamukhaani va, eversiiikulu 57, "Yoolya ya ekeekhayi ni Yoowurya ya ekeekhayi." Nwiryane etthu Owo ohimye'awe va.

Nto siiso Atiithi yaawo arina ekumi akirumme, ni miyo kinnikhala mwaha wa Atiithi Aka: siiso-tho ole onikhuura erutthu aka, onookhalana ekumi mwaha wa miyo.

⁹⁵ Mwa moolumo makina, "Atiithi aakiruma Miyo, nto Miyo kinkhala mwaha wa Yaawo. Ni khula mutthu onrwa wa Kristu ohaana okhala mwaha wa Kristu." Oh, wulu, eyo eri vo, eyo ti ekomunyawu. Eyo ti ekomunyawu y'ekeekhai nyuwo mumphwanyanyu mwaakhalaka mwaha wa Kristu.

⁹⁶ Vano, irutthu sahu sinnitthuna yoolya ni yoowurya khula nihiku, wira sikhaleke, erutthu ahu ya ethayi. Naahilyeeke yoolya khula nihiku ni owurya, nto erutthu ahu enkhala yootteettheya. Yookhala etthu mwa hiyo vantthuneyaaya okhalana yoolya. Yoolya ya nihiku nimosa khenkhala mpakha mmeeloni mwaya. Muhaana okhalana yoolya khula nihiku, wira munvahe ikuru ookhala anyu onkhwa. Munoowerya okhala nihiku nimosa mpakha nikina, masi nyuwo munkhala ootteettheyaxa. Nto nihiku na neenli, nlelo munkhala ootteettheyaxa. Nto nihiku na neeraru, munkhala ootteettheya voowoopihaxa.

⁹⁷ Ahe, eyo t'ile imaara sinci-ene hiyo eniir'ahu mwa mpantte wa erooho. Moone, khula nihiku nihaana okhalana ekomunyawu ni Kristu. Nihaana olavula ni Yoowo khula nihiku. Nihaana olokiha ni Yoowo khula nihiku. Paulo ohimye wira, "Miyo kinnikhwa khula nihiku." Munnona? "Khula nihiku, miyo

kinnikhwa; hata kikhhalaka, nkihiyo miyo masi Kristu onkhala mwa miyo.” Tivo, vakhala wira erutthu anyu ya ethayi ennitthuna yoolya khula nihiku ni yoowurya khula nihiku, wira mukhaleke, erutthu anyu ya erooho ennitthuna Yoolya ya erooho ni ekomunyawu n’Apwiya khula nihiku, wira mukhaleke. Ayo. Yesu ohimnye wira, “Mutthu khankhala mukumi ni yoolya paahi, masi ni Masu othene ankhuma mwaano mwa Muluku.” Tivo, khula nihiku nihaana omusoma Bibilia. Athu akina khammusoma Owo nnakhala. Akina ammuttotta Owo vaara vaili wala vararu mwaakha ntero. Masi, ole eekeekhai, mulipa-owaamini eekeekhai okhanle oolipihiwa mwa erooho, onnimusoma Bibilia awe khula nihiku, ni onnilavula n’Apwiya. Ti yeeyo. [Nipuro vahiitthu mufiitani—Mol.] Owo ohaana wira. “Mutthu khonkhala mukumi ni yoolya paahi, masi ni Masu othene ankhuma mwaano mwa Muluku.”

⁹⁸ Vano, etthu ekina hiyo enlyelyaahu yoolya, olipiha erutthu ahu wira yiisaakiheke iretta. Mwaahilyeeke, ni ohiya erutthu anyu oteettheya, vano ti yoophwanya iretta. Iretta sinookela olukama mphomeni, nto vo munimookhwa. Ephome anyu yaahikhaleru yoowaatta ni yooloka, ahe, vano eno, eretta enookela mphomeni mwanu. Tivo muhaana olya yoolya yooreera ni yooliphi wira ekhaliheke ephome anyu yoolikana. Vaahikhale siiso, munookhala oorava iretta. Owo ti mulattu n’aKristu anci-ene.

⁹⁹ Ntoko miri sa muxituufani. Moosuwela, onkumihiwa mwiri muxituufani, ohaana weepesiwa. Owo khonsuwela mukhalelo wa okathi. Khonsuwela waarya wa nsuwa ni itthu, kweekwe onkhhalaka wookhuneeliwa ni wooweepesiwa. Nto owo t’ukhanle mulattu ni anci-ene anihaniwa aKristu, iyo miri sa muxituufani. Ti yeeyo, soorava khula mwaaxitthu onrwa! Moosuwela, ti paahi mi—mi . . . Ti paahi mi—miri soovevere ya sirina otatheliwa murette, wala, miri soopahuwa.

¹⁰⁰ Moosuwela, mukuxe enyompe ya khalayi ya manyaka oorakama vano mutaphule mmunyepuni mmwe, nto mutaphule enyompe ya manyaka oorakama vale, ele yoorakama manyaka enniwerya wiiseettiha okhala wira muxovo woopacerya. Masi mukuxe emosa Brangus wala emosa Herefold sikhanel mixovo sootakanxiwa ni soopahuwa, enyompe yooreera oweha, tthiri, yonenevaxa ni yookhalaxa sikumi, masi mutaphule iwe, khasinwerya wiiseettiha. Iyo sinimookhwa! Sihaana weepesiwa. Munnona?

¹⁰¹ Nto owo t’uri mulattu olelo, hiyo nrina aKristu oowara saana, ikereja suulupalexa, ni soosareya o—osoma, teyoloxiia munci-ene, masi awo ahaana weepesiwa okathi wothene, muhaana wiiraana ni yaawo ahiiso muupuwelo anyu woovonyeya. Etthu entthun’ahu ti aKristu a ephome yooloka, ooyariwa vathi v’Ephome ya Pwiya Yesu, ahinkhala mwaha wa teyoloxiia a ekereja, masi ni Masu a Muluku, ekomunyawu

ni Kristu. Masu ekelaka mwa mulipa-oowaamini, yawawe—erutthu awe ya erooho t’entekiwa. Kahi mwaana a muxituufani!

¹⁰² Aahikhala murumeyi mmosa iirale olelo, miyo kiroomwiiwa, owo ohimnye eyo mprokramani ya muraatiyuni, owo ohimnye, wira okathi owo orwiiyaawe mulaponi, owo aahikhhalana mukattiyamiho muulupale wa nikusaku, ni waahimmwa mwaha wa operasawu. Ni khuhimmwa wira yaarowa wiiriwa *ela* ni *ele*, ni omuthikila ni omooperari, ni okumiha ipantte sa erutthu sa nikusaku, yaarowa opwiniha owiitho wawe, ni sikina siiso. Nto ohimnye wira aahiwurya ikininu sinci-ene. Yaakhala ntoko wira saahikhala mirette sinci-ene aarinaawe owurya. Masi varwiiyaawe wa meetiku oosuwela muKristu, meetiku khwira, “Nrowe niliyale ikininu ni niliyale operasawu, nto nrowe nilipihe erutthu wira yiisaakiheke nikusaku.” Ti yeeyo!

¹⁰³ Mulattu ene xeeni atthu ahinkhalaaya vanci-ene ntoko yaakhalakaaya? Nihaana omwaakhela mwaapomphe a *ela* ni mwaapomphe a *ele*, ni wiitathela mithinto sothene sa mirette. Eniira exeeni? Ennikhaliha oowoolowa, ooneneva, oonyala, oohireerela etthu. Okathi mutthu a khalayi. . . Vano, ninkhala oorava itthu sothene. Vano ankhala ni eretta ya oneeniwa ni sothene sikina.

¹⁰⁴ Kaaphwanyaneya wAfrika, nkaawerya omwaakhela mwaapomphe a ettekuxa. Masi epwilimwithi ya ettekuxa yaakilaanthe—ru vantatani vaka, kaamphwanya ettekuxa. Iyo khasininla, ni ti voorika nyuwo osuwela. Iyo sinookatela, iyo sinookatela paahi, ti yeeyo, moophwanya. Mwakhala mukumi, munookhalana eyo miyaakha muloko ni mithanu. Vano nto imaara sikina munookhwa ni yeeyo. Nto yaahikhala axineene elapo ale mmirapathani mwaya sikaani, ni ipwilimwithi mmettoni mwaya mothene, awo ahiwarans’etthu. Ipwilimwithi saalumaka, ipwilimwithi sa ettekuxa, nave khisaahaaxa. Mwaha wa xeeni? Awo yaahikhhalana ehiphwanyelo. Awo yaahikhhalana mwaapomphe oovahiwa ni Muluku.

¹⁰⁵ Nto owo t’uri mulattu olelo n’atthu. Owo t’uri mulattu ni ekereja. Ninoowaakhela amwaapomphe anci-ene a teyoloxiia oopakiwa ni mutthu, mpakha ninkhalaahu othene ootatheliwa. Etthu entthun’ahu mwaapomphe a Muluku ni Masu a Apwiya Muluku. Mutthu onookhala nihiku ti nihiku ni muthinto yoowo wa Yoolya, wira okhalihe munep’awe woopomphwa ni murette wa iretta sa muroohoni seiyo simphattuwa ni otupha mulaponi mothene. Kookhalana soolepa sinci-ene sa yeela, masi kihaana omaala.

¹⁰⁶ Vano, mwiilipihe, mukhale oolikana wira mmwaakhele mwaapomphe. Vano, hiyo ninkhala mwaha wa yeela, sawihu—irutthu sahu sihaana okhalana yeela. Nto, naahiire weeso ninkhala oorava mithinto sothene sa iretta. Ni Masu a Muluku,

ntoko sinaamini ahu Yaawo ni waakhela Yaawo mwaha wa ekomunyawu, “Pwiya, Masu Anyu Ekeekhaii.”

107 “Ekerej’aka enihimya wira khivantthuneya oyariwa vasya. Awo aniira, ‘Ovahana matata ti oyariwa vasya.’ Awo aniira, ‘Omiseriwa.’ Awo anihimya itthu iya sothene sikina, ‘Ti yeeyo, Tithi, Mwaana ni Erooho Yoowaarya.’” Masi Bibilia ohimnye wira mpatisiwe ni Nsina na Yesu Kristu. Munnona? Vano, nyuwo mukeleleke ohoolo ni amwaapomphe awo oopakiwa mwatthuna vale, munimwiikhaliha muKristu oopakiwa. Munnona? Nyuwo khamuntthuna eyo.

108 Khamukhanle okhalana Ekumi, voohikhala mwa Kristu paahi. Nto vano exeeni Masu Awe aniir’aya? Awo anlipiha erutthu ahu ya muroohoni, ya ikuru, naakhalanaka ekomunyawu ni Yoowo, wira nimukhootteke xetwani.

109 Nyuwo muniira, “Munna Branham, exeeni iyo munihimyaanyu, ‘okhalana ekomunyawu mwa Masu Awe?’”

110 Ayo, Owo ti Masu. “Wopaceryani naari Nsu, nto Nsu naari ni Muluku, ni Nsu naari Muluku. Vano Nsu nihiipaka erutthu khukhala ni hiyo.” Ni eri wira nikhuureke erutthu Awe. Vano erutthu Awe ti Masu Awe, okhala wira Owo ti Masu. Ni Owo oohimya, mwa Yohani Oowaarya 15, “Nyuwo mwakhala mwa Miyo, ekomunyawu Aka, Masu Aka, yakhala mwa nyuwo, vano munoowerya ovekela etthu entthun’anyu nto munimwiireliwa.” Eyo eri vo. Eyo ekeekhaii. Moone, nvekeleke etthu entthun’anyu!

111 Muniira exeeni? Munlipiha erutthu anyu wira mpomphe mwaha wa e...Mutthu onoorwa ni wira, “Oh, ekerej’ahu khenaamini okhuwela.” Moone, nyuwo moolipihiwa. Exeeni? Mookhalana ekomunyawu mwa nyuwo, Masu. Ni moopomphe voowanana yeeyo. Itthu sa ethiru sakela, exeeni iyo? Kherina Masu nwa yeeyo, vano nyuwo mookupali wira eyo ti yoovonyeya. Miyo nkincala moota xeeni enikhal’aya ntoko y’ekeekhai, yaahikhale Masu muhikwannye. Ekeekhai, muhikwannye. Miyo nkincala etthu eniir’aya, ehaana olikana ni Masu!

112 Kivekelaka, okathi kaamuhimyaaka Mikaya eemenle-ene vale, nkawehani, yaakhala ntoko yoolikana saana, okathi aakhanle-awe Isarayeli, nto ekapatti ile y’elapo yaari ya yaawo. Atthu ale a elapo y’okhopela jaarimoorwa khuwaakha ni khuteka mampa aya, ni awo yaakuxale epantte ya elapo Muluku aavahanse-awe. Tivo yaakhala ntoko maprofa ale imiya xexe aHeperi yaahikhala exariya. Masi, moosuwela, yaahikhala etthu emosa wa Yehosafati yaari ya erooho, owo iirale, “Nyuwo khamurina mukina?”

113 Khwira, “Kihaana mukina, masi,” khwira, “Miyo kinnimunyokha. Etthu emosa paahi eniir’awe olaleerya yootakhala.”

Khwira, “Murowe mmuruuhe nimwiwe.”

114 Vano owo khurowa, owo khwira, “Rowakani, muroweke-wo, masi koomoona Isarayeli omwaramwareya ntoko ipwittipwitthi sihirina makhampusi.” Vano nto owo khuthariha yoowoona awe.

115 Vano, t’ani aarina exariya? Yaakhala ntoko ale imiya xexe ti yaarina exariya. Axilopwana imiya xexe ooxuttihiwa saana, yiraka, “Rowakani, Apwiya ari ni nyuwo.” Ni hata Sitikiya aahikhalana n—n—n— aahikhalana n... Sitikiya aahikhalana manyaka maili maalupale a yuuma aapanke-awe. Owo khwira, “Ni yeela munoowoomola amalapo ale mulaponi.” Owo aahikupali wira aahikhalana exariya. Owo aahisuwela wira aahikhalana exariya. Masi, moone, owo aahivonya.

116 Nto va, Mikaya, mmosa oovirikanyana ni imiya xexe, nto owo khwira, “Nyuwu mwarowaru, Isarayeli onoomwaramwareya, ohikhalanne makhampusi.”

117 Nto akina khwira, “Rowakani, Apwiya ari ni nyuwo!” Vano, mwa erutthu, awo yaahikhalana exariya, nipuro nlo naari na Isarayeli. Masi Masu a Apwiya yaahimulamula Akhabi, vano vaaweryaneya sayi Muluku oreeriha etthu Owo aalamunle-awe?

118 Eyo eri vo olelo. Munnona? Masu a ekomunyawu yaari mwa Mikaya. Vano, nyuwu mwaakhalanaka ekomunyawu ni Muluku mwaakhelaka ekomunyawu y’ekeekhai, ni erooho mwa nyuwu enavaanyiha Masu ala, khamunkhalana ekomunyawu ni Muluku, munkhalana ekomunyawu n’axetwani. Ni awo t’otakihaxa! Bibilia ohimye wira, “Mahiku ookiserya awo yaamurowa owootoha ale Oothanliwa vaakhanle wira vaaniweryaneya. Masi erimu n’ilapo ya vathi sinoovira, masi Masu Aka khanvira.” Nto vakhala wira... Paulo oohimya, aKalasiya 1:8, “Nakhala nlaikha ninkhuma wirimu ninlaleya ehapari envirikana ni Ela nyuwu mwiiwaly’anyu, nitakhaliwe.” Hata nlaikha! Mukereja yoopacerya, okathi axilopwana ale, ntoko Martin Oowaarya, Irinewu, atthu ale ooreera murima, okathi xetwani aakhumelelaawe ntoko nlaikha na waarya. Masi, nwehe, owo onrowa okhala ota wa Masu vakhani.

119 Owo aahimukhumelela Hawa ntoko nlaikha na waarya, khimuleela, “Tthiri, Apwiya ahimye *ela*, Apwiya ahimye *ela*,” masi owo khaaiwananne ni Muluku wookiseryani wene. Nto ti siiso ekomunyawu yoowooothererya eniiraaya olelo. Atthu yuupuwelaka wira aninvekela Muluku, nave ehithhunaka otthara Masu, eyo ekomunyawu yoowooothererya.

120 “Nyuwu mwakhala mwa Miyo, nave Masu Aka mwa nyuwu, vano nvekeleke etthu entthun’anyu,” moone, “nto enimwiiriwa.” Vano, eyo khekhanle okhalaka mpuwa emaara emosa, vano ota emaara ekina. “Nyuwu mwakhala mwa Miyo, Masu Aka yakhala mwa nyuwu,” eyo ti, okhala vaavo. *Okhala* enihimya “omumula vaavo, mukhale vaavo vo.” Ayo, iwo—iwo ti opomphwa wo owanana iretta sa etampi.

¹²¹ Vano, mukihye kimalihe kihimyaka nuulumo nla vano, nihinatthi orowa vameesa va ekomunyawu. Ephome ni Erutthu y'Apwiya, yootakanxana ni waamini, eyo ti Ephome ni Erutthu, eyo ti Erooho ni Masu, yootakanxiwa ni waamini, enkhala Ekumi Ehinimala. "Ole onkhuura Erutthu Aka ni onwurya Ephome Aka ookhalana Ekumi Ehinimala, nto Miyo kinoomuhihimuxa nihiku nookiserya." Eyo eri vo. Exeeni iyo? Ekomunyawu y'Apwiya. Masu ni Erooho, Ekumi ila eri Mphomeni, Masu ni Erooho enkhala Ekumi Ehinimala, mwaha wo owaamini Apwiya.

¹²² Ala ti mavekelo aka, okathi onoonaka emalelo yaattamelaka ni wona wira, khula minuutu, vaamuweryaneya okhumelela etthu, ni osuwela wira khanirakamenle Orwa w'Apwiya:

Pwiya, vano mwa Nsina na Pwiya Yesu, Mwaana a Muluku, mukihye kikuxe Masu, Xoowa, ni kimweettiherye ni waamini orinaaka, ni kithikile ephiro ya owerya wothene wa xetwani, mpakha kimoone Yesu, mwaha wa opatthana ni Masu Awe.

¹²³ Opatthana ni Masu Awe. "Nyuwo mwakhala mwa Miyo, nave Masu Aka mwa nyuwo, vano mukivekeleke Miyo etthu entthun'anyu nto munimwiireliwa." Moota ereeraly'aya! Yookhala ekomunyawu y'ekeekhai ni Masu ni Erooho, ni waamini wo wettiherya Seiyo vamosa, "Nvekeleke entthun'anyu, nto munimwiireliwa." Nivekele.

¹²⁴ Tithi Muluku ooreera murima Oosuwanyeya Oowaarya, MIYO KOOKHALA muulupale, El Shaddai, wa Abrahamu. O Muluku, moota ekomunyawu ila yuulupale y'Apwiya enkhala Ekumi Ehinimala, ni moota Eyo empophaaya wo owanana wiisoona, moota Eyo empophaaya wo owanana ohaamini, moota Eyo empophaaya wo owanana etampi ya molumwenkuni! Eyo ekomunyawu, ni ophenta wa Muluku wa Tith'ihu a Wirimu. Nto mwaha w'exariya ya Yesu Kristu hiyo ninnipherya meesa ala. Nto hiyo ninvekela, Pwiya, wira Nyuwo munvahe khula mmosa wa hiyo opherya ohiy'ula, mwa Erooho. Munilevelele. Ni nintthuna wira irutthu sahu s'eroho sinnuwe. Hiyo khanincala wiitakanxa mukereja wala muromolelo. Hiyo nintthuna wira irutthu sahu sa erooho sinnuwe, wa opomphwa ni murette wa etampi, nikeleka nipuro vahinkhalaaya otthuna-tho wira yootakhala, ni vaavo Erooho Yoowaarya ekhanlyaaya okuxaka Masu Aya Eneene ni iyano sahu, ni olavula Yaawo vasya ntoko Awo saalavuliwaaya nihiku nle, okhala wira Eyo Erooho emosaru yaari mwa Pwiya Yesu. Miyo kinnivekela, Tithi, wira Nyuwo munivahe yeeyo.

¹²⁵ Iwoora sinoomala. Okathi xeeni, hiyo khanisuwenle, ole ookiserya onrowaawe woopowa. Masi kinnivekela ohiy'ula, Pwiya, yaakhanle-ene va ale ahinoosuwelani Nyuwo ntoko Moopoli aya, awo yoophwanyeni ohiy'ula jaarwaaka mmaasini

mu a opatiiso, ntoko eyuupuxeryo, ohimeerya erutthu ila y'alipa-oowaamini wira annimwaamini wahala wira Yesu a oNasareti aayariwe ni Maria harus, ni aahiiviwa, khukhomeliwa ni Ponsio Pilato, ni khuhihimuxiwa mmurotoni mwaya ni Muluku, ni okilaanthe moonoo woolopwana wa Omwene Awe, ohiy'ula, onkhala voochimala-tho wira olapelake.

¹²⁶ Munivahe, Pwiya, wira mutthu ene yoowo, attharihelaka sooruma sa Bibilia, "Murukunuxe murima, khula mmosa a nyuwo, mpatisiwe ni Nsina na Yesu Kristu wira muleveleliwe itampi sanyu. Maana khanivo nsina nikina vathi v'Erimu nivaheriwe eriyari y'atthu vaavo murin'anyu woopowa." O Muluku, atthu yoone exariya ya yeeyo, ni Masu oolipa, "Khanivo nsina nikina vathi v'Erimu nivaheriwe eriyari y'atthu vaavo murin'anyu woopowa, masi mwa Nsina na Yesu Kristu." Tivo, murummwa ohimye wira, "Murukunuxe murima, khula mmosa a nyuwo mpatisiwe ni Nsina na Yesu Kristu wira muleveleliwe itampi, nto munimwaakhela yoovaha ya Erooho Yoowaarya. Tthiri natiri t'a khula okathi, othene ale Apwiya Muluku ahu antthun'aya owiihana." Munivahe, Pwiya, wira okhale wiihaniwa wunci-ene ohiy'ula.

¹²⁷ Ni yoohimmwa-tho, ni Pwiya'ahu, "Khaavo onwerya orwa wa Miyo ehikhanle wira Atithi Aka anoomuruuha, ni othene ale Atithi akivanh'aya animoorwa wa Miyo. Ipwittipwitthi Saka sinniwa Nsu Naka." Ootikiniha, ole ootikiniha alavularu, nsu nihikhanle noolempwa, naanaanoru epwittipwitthi enoosuwela. O Muluku! Nto nlo nakhala Nsu Nanyu, Bibilia, etthu Owo enihimyaawe, khula epwittipwitthi enimwiiwa Nenlo, okhala wira Eyo Yoolya ya epwittipwitthi. Iyo sinnikhalanaka ekomunyaawu. Iyo sinnisuwela muthinto xeni wa Yoolya Atiithi anvahaaya. "Mutthu khankhala mukumi ni yoolya paahi, masi ni Masu othene ankhuma mwaano mwa Muluku." Munivahe, Pwiya, wira anci-ene yoone ni aiwe saana, ni erwe wa Nyuwo ohiy'ula.

¹²⁸ Ale ahirina Erooho Yoowaarya, wira ahinteerye-tho hata ewoora ekina. Pooti okhalaka olekelaxa ewoora emosa. Siiso awo ehikhalaka vaava.

¹²⁹ Nto, Tithi, ntoko sithukumann'ahu nirukurenrye meesa vano wira naakhele ethoonyeryo ela ya erutthu Anyu yookheriwa, hiyo ninvekela wira yaakhanle-ene etampi eriyari ahu, Pwiya, munilevelele. Nyuwo muhimye wira, "Nyuwo mwathukumana vale, nwehereryaneke mukina ni mukhwaawe." Muluku, yaakhanleene etampi vamuthukumanoni va, nipuro pi nipuro, kinvekela wira Ephome ya Yesu Kristu envalaanihe mulopwan'owo ni etampi awe, wala muthiyan'owo, mmiravo wala mwali. Nto, Tithi, miyo kiniivekelela mmansaka, wira Nyuwo mukivalaanihe ohoverya wothene, etampi yothene, ohaamini wothene, khula etthu e...Hiyo noosuwela wira ohaamini etampii. Eyo etampi emosa paahi ekhanle. "Ole

ohinaamini oohukhummwa.” Nto etampi emosa paahi ekhanle, ohaamini Masu a Muluku. Nto, Tithi, waakhanle-ene ohoverya mwa miyo, mukilevelele, O Muluku, yoowo okhanle wunci-ene, ni miyo kinvekela wira Nyuwo mukilevelele. Mulevelele muthukumano aka Nyuwo mukivahalyaanyu ohiy’ula, ni mwaalyihe ni Masu. Munivahe.

¹³⁰ Ni nikuxaka itthapelo iya sikhaani sa erutthu yookheriwa ya Ole ohihimunwe mw’alipa-ookhwa ni onkhala voohimala-tho eriyari ahu, naakhele ekomunyawu wa Yoowo, Pwiya, ekomunyawu ya Erooho Yoowaarya. Munivahe, Tithi. Hiyo ninvekela mwa Nsina na Yesu. Amen.

¹³¹ Vano, wa nyuwo muntthuna orowa ni muhinwerya ohala mwaha wa epanthe ya ekomunyawu ya minuutu soophiyaka muloko ni mithanu...Khanhiyo oowaatta, ni ninrowa waakhela ekomunyawu. Kehiyo ekomunyawu yoowaliwa. Eyo vekeekhai ti ya khula mulipa-oowaamini muKristu. Muluku khorina mukaano wookwerethiwa eriyari ya aPatista ni aMetotista, ni akina. Hiyo othene nri, ni Erooho emosaru, noopatisiwa mw’Erutthuni emosaru, nto hiyo n’atthu a muttethe mmosa a Momweneni mwa Muluku. Nto akhala mutthu eriyari ahu okhanle namurwa, miyo nkinkhala va okathi munci-ene, ni nkinsuwela ti pani okhanle mmpuru ni ti pani ohikhanle. Muupuwele, hata wira aniira mpantte wa ekereja xeeni, eyo kherina naata n’iyo. Eri Ekereja emosa paahi, khula enamuna, ni nyuwo khamuniitakaniha Mwemmo, nyuwo muniyariwa Mwemmo. Ti yeeyo. Ni nyuwo muniyariwa Mukereja yeela ya Muluku. Ni ninvekela wira nyuwo mmwaakhele Kristu ohiy’ula, mukhalane ekomunyawu ni Yoowo nuupuwelaka erutthu Awe yookheriwa, ni itthu iya sikhaani hiyo ninkuxaahu, sa paasikha, ni wira Muluku otathele mattoitto a Ephome mmurimani mwahu ni muupuwelo.

¹³² Vano enooruuhiwa ekomunyawu, ni ninrowa osoma vano mwa aKorinto Oopacerya, kapiitulu 12. Nto ninrowa waakhela ekomunyawu naanaanoru nuumala yeela, ni ninroromela wira Muluku onimooreerihani vanci-enexa. Vano nimalihaka-ru osoma ela, wala nihinatthi osoma, mwatthuna vale orowa, ahe, mukhumeke voomaleleya. Vano nto mukhale-tho ni hiyo Namararu ohiyu, ni Ttiminku voosiisu ni Ttiminku ohiyu. Mwawerya-ru ohala mwaakhela ekomunyawu ni hiyo, ninookhala ooteeliwa murima mwaha wa nyuwo wira siiso. Nto naanaanoru nuumala yeeyo, anrowa okhala Apwiya...onrowa okhala muteko wa opatiiso, yoowo onrowa okhala muhina mwa minuutu muloko ni mithanu, wala miloko miili omalela waatta, woona waka. Akorinto Oopacerya, kapiitulu 11, versiikulu 23.

*...miyo kahaakhela wApwiya ele nave-tho
kiwiixuttihalyaakani, Wira Pwiya Yesu ohiyu yoole...
waavarihiwaawe aahikuxa mukatthe:*

Ni nuumala oxukhuru, aahikawanya, . . . khwira, Mukuxeke, ni mukhuureke: ela ti erutthu aka, munvaheriwaanyu nyuwo: mwiirke iya mukuupuwelaka miyo.

Siiso-tho ni vaamanle-aya olya, aahikuxa ekahi, airaka, Ela ti ekoopfo ya waataana wa naanaano mwa ephome aka: mwiireke yeela, ikwaha sothene nyuwo munwuryaanyu, mukuupuwelaka miyo.

Tivo okathi wotheene munikhuuraanyu mukatthe ola, ni munwuryaanyu ekahi ila, munlaleya okhwa w'Apwiya mpakha vanrwaya.

Tivo ole ohinrowa okhuura ela . . . ole onkhuura mukatthe ola, ni onwurya ekahi ila y'Apwiya, ahiphwanelaka, onnithekela erutthu ni ephome y'Apwiya.

Nto khula mutthu apaceryeke okoha murima awe, nuumala akhuureke mukatthe owo, ni awuryeryeke ekahi iyo.

Okhala wira ole onikhuura ni onwurya ahiphwanelaka, onikhuura ni oniwurya ehukhumu awe, ahithokoreryaka erutthu y'Apwiya.

Mwaha wa yeeyo anci-ene aretta ni oohilipa eriyari anyu, . . . anci-ene anrupa.

Okhala wira hiyo naakoha murima ahu, khinaaphukiwa.

Masi okathi nimpukiwaahu, ninnittharuxiwa n'Apwiya, wira nihihukhumuwe vamosa ni olumwenku.

Vano, axinn'aka, nyuwo mwaathukumanelaka olya, nwehereryaneke mukina ni mukhwaawe.

¹³³ Vano, okathi vakhani paahi wa mavekelo voomaaleleya wa khula mmosa a hiyo, mukivekelele miyo koovekelelakani. [Munna Branham onvekela voomaaleleya—Mol.] . . . ? . . .

Munivahe soovekela iya, Muluku Oowerya sothene. Munilevelele sootheka sahu siiso hiyo sinaalevelelaahu ale annithekela. Ela hiyo ninvekela mwa Nsina na Yesu Kristu. Amen.

¹³⁴ Ikapatti iya sikhaani mikatthe kosher simpakiwa woohikhalana makhura a enama, ethitelo, ni sikina, yeeyo enthoonyerya erutthu y'Apwiya. Kehiyo yoovilikeya, ti yookawanyiwa yothene mapattuuxa. Okhala wira eyo enihimya erutthu Awe yookawanyiwa ekawanyeriwe hiyo. Nto Muluku anvahе iparakha Sawe wa khula mutthu onkhuura. Vano, kehiyo erutthu, eyo enthoonyerya erutthu paahi. Nkirina owerya, khaavo-tho orina, wo okhaliha ethu ekina woohikhala

mukatthe. Muluku paahi. Nto ti yeeyo Owo onihimenry'awe, wira nikhuureke mukatthe ola ni owurya ekoopho ela ya eviinyu. Vano nrowe nuuramihe muru.

¹³⁵ Muluku Oowaaryaxa, nikhanle arumeyi a Yoowo, mwa Nsina na Yesu Kristu, mureerihe mukatthe ola wira orumeeliwe etthu opakeliwaaya, wira vaireye wira, okathi hiyo onaakhelaahu, nuupuwele wira Pwiy'ahu aahikhomeliwa vamwiikimanyo; nto erutthu Awe, yooreeraxa ni yoowaarya ntoko yaary'aya, yaatakanxiwe makhwatta ni miiwa ni ipereku, mwaha wa hiyo, wira mwa erutthu Awe yookheriwa ekhume Erooho ennivaha Ekumi Ehinimala. Wira hiyo, Pwiya, okathi hiyo onikhuuraahu yeela, nikhalane mahala ooweetta mukwaha, ntoko Isarayeli sairaly'awe miyaakha miloko mixexe mothakoni, ni woohikhala hata mmosa ootteettheya eriyari aya. Tithi Muluku, munivahe ela, noovekelakani Nyuwo wira mureerihe mukatthe ola, ephawu kosher, wa ele entthunaaya orumeeliwa. Mwa Nsina na Yesu. Amen.

¹³⁶ Muhasa wa Waataana wa Naanaano, Ephome. Kinuupuwela nsipo nle:

Okhuma okathi koonalyaaka muro ole mwaha
wo waamini
Makhwatta anyu anvira anivahaaya,
Ophenta onvuluxa t'ukhanle mwaha aka,
Ni onookhala mpakha miyo okhwa.

¹³⁷ Koonaka ephome ela, iwuuva, ephome ya iwuuva, koosuwela wira enthoonyerya Ephome yaakhumme mw'erutthuni mwa Apwiya Yesu. Othene ale anaakhela ela ekhalane Ekumi Ehinimala, iretta sikhume mw'erutthuni mwaya, wooceya ni olosowa, ohaaxiwa, xetwani (mwa khula mukhalelo) aakhume, wira ekhalane ikuru suulupale ni okumi ni Ekumi Ehinimala, wira ohiye muthuko aya waaryeke ohoolo wa nloko nla nootakhala ni noorarawa ninkhalaahu-mo, wira envuwihe Muluku.

¹³⁸ Tithi a Wirimu, hiyo ninniruuha wa Nyuwo muhokorokho wa eviteera. Mwa Nsina na Yesu Kristu, mureerihe, wira ethoonyerye Ephome ya Mwan'Inyu, Yesu, mwa Yeeyo hiyo nookhalana, "Onyakatteliwe sootheka sahu, makhwatta Awe t'anivoninhe." Munivahe, Pwiya, wira Ekumi erwe wa hiyo, Ekumi Ehinimala voowaattaxa, wira niwerye woorumeelani Nyuwo saana, okhalana ikuru ni ekumi sooniroiha nipuro nniipuro weiwo onroromelaahu woorumeelani, khula nipuro onniitthanelaanyu-wo. Munivahe iparakha iya, mwa Nsina na Yesu, hiyo ninnivekela. Amen.



EKOMUNYAWU EMK62-0204

(Communion)

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku ohiyu, mahiku yeetaka 4 mweeri wa Fevereiro, 1962, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2022 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org